



08757

顏氏家藏尺牘卷二

王官谷

士有負盛名卒以虧大節咎在見事遲不能自引決所以貴知幾介石稱貞潔唐至僖昭時干戈滿天闕賢人雖發憤無計匡机棹邈矣司空君保身類明哲放逐歸山阿閉門卧積雪視彼六臣流恥與冠裳列遺像在山厓清風動巖穴堂茆一畝深壁樹千尋絕不復見斯人有懷徒鬱切

先妣忌日

顏氏家藏尺牘卷二

一 海山仙館叢書

風木凋零已過時一經猶得備人師聞絲欲下劉馥泣執卷方知孟母慈秋雨秀連中野蔚夕陽光起後園葵無窮明發千年慨豈獨杯圈忌日思

顏氏家訓荒亂以來雖寒暄之子能讀孝經論語者尚爲人師雖奕葉冠冕不曉書記者莫不耕田養馬常熟縣耿侯橘水利書

神廟之中年天下方全盛其時多賢侯精心在農政耿侯天才高尤辨水土性縣北枕大江東下滄溟勁水利久不修累歲煩雲崇疏鑿賴侯勤指顧川原定百室滿





倉箱子女時昏聘洋洋河渠議欲垂來者聽三丞饒凶  
荒每與師旅併誰能念遺黎百里嗟懸磬况此戎寇深  
早夜常奔迸上帝哀俾婺天行當反正必有康食年河  
雒待明聖自非經界明民業安得靜願作勸農官巡行  
比陳靖畷澮徧中原粒食詒百姓

瓠

瓠實向秋侵粵然繫夕林不材留苦葉槁死亦甘心偶  
伴嘉蔬植還依舊圃尋削瓜輸上俎剝棗遜清斟衛女  
河梁迥涇師野渡深未須驚五石應信直千金作器疑  
無用隨流諒不沈試充君子佩聊比國風吟

顏氏家藏尺牘卷二

二  
海山仙館叢書

弟於九月二十日保出十一月十日一案之人俱已赴  
院畫供想有題結之望凡所以入險能出困而不躓者  
皆知已扶持之力當世世尸祝不敢以楮墨宣矣前具  
近詩六章曾徹覽否屢有札與舟公託其致感而未見  
一報豈其移寓或石頭之沈浮耶今有一函所致之近  
况詳之函中可共覽也旅食無依暫寄徐玉老署中不  
謂有延安之陞則此中別無主人矣萬老先生書已投  
似蒙注念院批取保一宿便發也弟候命下結案卽詣

都中叩謝如尙遲則俟舍甥北上時代弟九頓台堦今  
來者玉老之僕囑其三日後走領回書涸寒不莊幸宥  
弟今年寓跡半在厯下半年在章邱而修志之局郡邑之  
書頗備弟得藉以自成其山東肇域記若貴省之志山  
川古蹟稍爲刊改其餘概未經目雖抱素餐之譏幸無  
芸人之病然以視令叔先生則真魯之兩生不敢望後  
塵矣汶陽歸我治之四年始得皆爲良田今將覓主售  
之然後束書西行爲入山讀書之計所刻座右語一通  
并音學五書面葉呈教近日又成日知錄八卷韋布之

顏氏家藏尺牘卷二

三

海山仙館叢書

士僅能立言惟達而在上者爲之推廣其教於人心世  
道不無小補也率此附候不宣

夏初匆匆出都歉然之懷難以筆道想道履彌勝大業  
日增令叔先生今在都門亦當聽鵲起之音奏鹿鳴之  
什矣弟久滯安德仰藉洪庇章邱一案已得小結雖陷  
害之情未明而霸占之律已正轉蓬思息倦羽思還九  
仞之功非仗婁侯不能終此一篲敢乞鼎致其詳在札  
中未緘以舟老正值文場不敢瀆札并乞於試畢日道  
意小价王登往庄故遣潘一廉其人謹厚望賜回諭詳



文於二十後到廳更懇家報中速聞之至禱至禱

昨出抵暮始歸承駕左顧失迕爲罪家訓勘畢送上並用硃筆以便一覽卽得幸爲另抄一本仍乞原本見賜感感弟炎武頓首

大作清勁無一俗筆太華伊闕諸作爲集中第一思悲翁戰城南亦有白傳諷諭之遺意大雅之音得復起於今日矣敬服敬服元稿返上畧商數字識以浮票未知有當否諸容晤悉弟炎武頓首

弟纔至城中尙未拜客老社翁須兩三日後以未申二

顏氏家藏尺牘卷二

四 海山仙館叢書

時過我則得晤矣大才何藉弟筆想未見刻啓耳附上  
一紙不盡弟炎武頓首

弟爲一二相知所留似須秋抄方可行昨諭抄書者能  
爲弟覓二人否弟炎武頓首

歲云暮矣欲走齋中一晤不知可得片刻之暇商訂風  
雅否此間殊覺總總弟於二十七日移至舍姪寓中度  
節肇域記想已閱畢幸付下此啓弟炎武頓首

弟以較讐之忙不及親叩專俾走送別有一函便中求  
投入理署令叔先生並希叱致知己之言不敢忘惟努

力讀書以庶幾無負相期之意也弟炎武頓首

捧讀大章清新婉逸逼似唐人所謂不意永嘉之末復  
聞正始之音者矣羨服羨服舊刻二冊乃五六年前作  
中有誤韻幸爲藏之河北關中書共六封馳上姓氏居  
址別開一紙煩照單分致昨枉顧以主人不在率爾慢  
去殊深不安統俟文旌東返面頌并求惠示西征大作  
耳長路關山濁涇清渭千惟珍重旦起作書數千字恐  
使人來取匆匆遂不能詳弟炎武頓首

詩本音二冊送上中有駁正者乃衛太史筆也此書未

顏氏家藏尺牘卷二

五

梅山仙館叢書

定不必抄錄只將坊刻詩經一本圈注其不合及太瑣  
碎者置之可也更祈教正爲荷底事一有信卽求示之  
弟炎武頓首

聞已具覆幸詳示之詩本音閱完并求付下弟炎武頓  
首

舍甥久積傾慕昨奉叩未晤今擬於初四日攀駕一譚  
俾弟亦得待聆誨言至感至感弟在初旬內亦欲出都  
矣弟炎武頓首

五日前曾走叩未晤旣台命諄諄不敢固強舍甥容另



卜日奉候但弟目下卽擬出都不得追陪一敘奈何奈何尙容趨別未悉弟炎武頓首

前有一函想已徹覽弟不遵明哲之訓果有此累今江友之驕吝足以致敗而與之同事奈何奈何南冠而縶竟不得出一切詳之舟老書中惟知已爲之共拯懇切懇切餘語去价能道不悉弟名心肅

前走叩未得面弟以十二三出都往德州此刻擬一造別并問貴鄉有旅伴可同行否退谷先生常問起居附及弟炎武頓首

顏氏家藏尺牘卷二

六 海山仙館叢書

弟來此區區之意尙未得少申爲歉廿四日出都前往歷下如有札寄示乞寫德州北李宅家報付報房封遞三四日可達李老先生諱源字星來原任河津令與弟交頗密卽可專人賫至省城也事畢再容趨至九頓報至德州先到蕭宅須卽轉至李宅有二李故稱北以別之小弟炎武頓首

來諭惓惓深感愛厚所云屢有言相致者止於舟札見之他皆未到卽賦梅者止有一札無兩札也所云但當力辨有無勿牽別事敬如台旨笥中之書昨至德州簡

點二日悉取而焚之矣并復此中之事大抵上有求而下不應弟遂無保出之法黃氏絕不照管債主斷絕日用艱難庄田之麥俱爲劉棍割去每日以數文燒餅度活何以能支欲乞一問南夏諸公若天生至晉可爲弟作書促之入京搏輦上一二函至厯下必多有所濟弟已別有字往關中矣一切統希垂照不宣舟書可互觀之弟名心勒

五月十九日院審先取有同案中年老者四五人保識黃御史曾已遵制剃頭口供次辨啓禎集中有甯人字

顏氏家藏尺牘卷二

七  
函山仙館叢書

無顧姓又不在黃御史一篇傳內并審出釁起章邱地土情由惟問姜要顧甯人輯書實證無詞以對又扳卽壘老諸生杜述交爲證此人從不識面又展轉推出所從得書之人爲萊陽孫榮榮乃積年走空之人今並行提去矣雖未保出而是非已定此皆上臺秉公持正及大人君子孚號壯拯之力惟有世世尸祝茲因便羽先此奉聞弟名肴具

屈處士大均

弟明日決行兩日俱在周老處承枉顧寺中失迓爲罪



明早當造楊奉別秋氣漸寒惟加珍攝爲望此復修翁  
道長兄弟大均頓首

弟明日乃能行尊集印成幸先以一二本惠教也畢右  
萬兄慕先生有道工文章欲得先生爲其尊公東郊先  
生作一疏草跋刻之此疏大有功於聖門望先生有以  
慰之右萬兄精心理學說而關二氏多發人所未發其  
晉謁先生蓋欲先生爲之印證所學也萬爲留神上樂  
圃先生弟大均頓首

李檢討因篤

顏氏家藏尺牘卷二

八 海山仙館叢書

曩過燕臺重親有道晤言未悉而班馬促旋年翁倦念  
故人不使雲泥懸望接塵屬飲歡若平生六翮高騫攜  
手孚於金石南箕北斗足翻明月之詩矣別來偃卧山  
中絕不聞門以外事去春亭林先生見訪始知年翁有  
苦次之哀倉卒東還事皆合禮猶憶吾兄通籍後輒迎  
老伯入都弟嘗就謁堂端一承杖屨典型淪落觸事悽  
然方期造賦大招薄展生芻之誼而弟適爲虛名所誤  
致諸公謬采 上聞號泣控辭半載殆無寧日甫得敝  
鄉兩臺垂憫取結移咨乃部駁旣嚴而 溫綸復再三

敦促不得已至舍白頭老母匍匐京師繕疏陳情扼於  
當路淚枯力盡溝壑是甘幸總憲魏公爲弟密題教孝  
一疏又流涕面奏 聖心惻然可免考圖歸矣遠荷朶  
雲寬其疏節且命爲老伯作追輓之什此固弟之夙心  
也眼底疲於應酬至衄血二次無一刻得暇容出京時  
於畿南近邑爲之並評閱尊集覓便鴻寄上萬不敢忘  
見贈大篇推獎踰分非謗陋所敢當匆匆附謝病眼昏  
暗屬舍姓書統冀鑒原不一

前荷吾兄遠貽翰劄賤子何人記不圖古道之猶存也

顏氏家藏尺牘卷二

九 海山仙館叢書

尊集謬肆丹鉛僭踰無所逃罪然寸波塊土仰佐高深  
誼忝夙交知吾兄不爲河漢耳老伯禔躬純粹當代儀  
型奉輓之詩必擬得其近似比者風塵稠濁寸晷無寧  
未敢以泛常應酬草草塞責况親承杖屨辱在通家吟  
哀些於九京海嶽共聞斯語歲內當寄紫瀾家弟所轉  
上吾兄並答大篇統呈郢削也弟久栖輦路違越慈親  
引領西風肝腸欲裂頃不自揆冒昧陳情蒙 主上特  
恩許以歸養目下束裝返里百緒茫然燒燭裁書苦無  
倫脊抵家喘息畧定即臆勉以踐前言拙稿半皆敬遺



偶得炎人刻送三紙請政新秋餘暑未盡諸惟珍玉不  
宜家舅送到餽餅不敢自私邀仁兄刻下過小寓同享  
之上修翁老仁兄弟篤頓首

宋廉訪琬

重九之集因爲王襄老公祝知老年翁無甚深交故未  
奉約嗣後同人雅席自當追隨鞭弭也小婿王生深以  
得御龍門爲幸其事之原委已經面陳各省起送者不  
止一人而當事狐疑不決業覓一要津致之倘得鼎札  
數行破其拘攣之見則雞肋微名可以成就或與泰升

顏氏家藏尺牘卷二

十

海山仙館叢書

兄共作一函祈惟台裁驟爾唐突殊爲不安但往返跋  
涉望此甚殷故敢冒昧以塞其請所謂慰其孺子意也  
送張幹老二詩呈教此題定有佳篇希賜一誦容卽趨  
謁面頌不旣

久睽教益殊切調饑前者恭候台安未得一見比聞道  
體已平良深慶忭敬懇者弟昔年蒙難有山右宰姓者  
周旋備至心甚德之今伊二子考譯宇生高昌館試者  
寥寥而字學無出其右冀老年翁拔置前列五六名以  
內庶得借手天功以報故人不啻身沐生成矣容趨謝

不一

夙疾纏綿日事藥餌兼以暑中無事不敢時溷興居用是久疏塵教耿仄何似啓者舍親謝名會同其尊人與先君子交好最深通世誼者非一日矣文頗成章字殊摹古歷試成均一時譽滿今咨部候考定職有最上一乘之望伏祈老年翁從公檢閱特賜主持俾得邀榮冠服以爲閭里之寵以慰讀書之志恩施所及弟自永矢弗諼甯第荷生成者戴高厚哉恃在至愛端此瀆陳惟冀垂神可勝禱切

顏氏家藏尺牘卷二

土

海山仙館叢書

長安需次追隨壇坫猥蒙老年翁不我遐棄納之聲誼之末提攜教誨情好肫摯何以得此於知已哉溽暑拜別暫過里門一展先人邱墓今已取道廣陵溯荆門而上峽中言念良朋渺焉萬里惟從峩眉山月想見紫芝眉宇耳敝邑公舉欲以先君從祀鄉賢例當歲終達部弟至楚中定有人至萬一文到在前望老年翁力爲照拂以從輿人之請則錫類之仁感均存沒矣望老子老代弟奉懇知自蒙慈注也合肥宛平兩先生前煩爲道鄙意匆匆率勒尙容嗣布可勝切禱



施侍讀閨章

昨歲專函壽簡公祖未達故以壽序稿封入借重鼎呂似可卽以此爲詞也賣舡詩不拘遲早興到則爲之正不必多佳牋同令叔箋刻並惠數紙以廣示同好章再頓首

枉顧失候甚歉重承雅惠不敢全卻已對令叔道此鄙衷矣感媿何似詰朝渡江匆匆不悉名另具

江關相見成近體一首以塵擾未得錄上夜來讀大作爽然歎息七言絕唐人獨具三昧妙在著力不得杜老

顏氏家藏尺牘卷二

七

海山仙館叢書

別出生硬稍似拗體便自專家尊作金陵絕句得無效此否去膚避熟洗盡時人粉膩亦是此體所少南苑扈從八首則粹然古人工力悉到難在作應制體不寒儉又字字新警頌美之中曲寓諷諫油然忠孝之意盤鬱言外於此道三折肱矣下問勤懇使僕不揣喋喋者何也販夫囊得一金而與量谷牛馬者論持籌之巧拙亦見其不自量矣抑昔人文字貴多商量朋友磨切或不廢云爾也抵京師有暇當數共晨夕盡發篋中之藏相與上下議論耳令叔季相亦奇士何時快晤言之神往

寓中雜沓潦草不倫勿罪勿罪

辱書得尊公先生表傳及佳詩一卷悲喜併集悔曩者不稍停東魯執手暗晤於洙泗之間也一別遂爾九年少壯幾何脩名不立自顧蒲柳早彫重迫暮齒平生記問十九茫然豈可復應宏博之科作後生技倆乃官司敦迫不許盤桓觸暑就道抵都下應酬喧冗便復委頓蓋自去冬十月寒嗽至今未得霍然筆墨意盡矣感德門世行力疾作誄不揆鄙拙又點竄大篇庸匠代斲其心則苦千秋之業甯刻毋寬僕自金陵讀牋刻已私目

顏氏家藏尺牘卷二

三

海山仙館叢書

以健手頃阮亭先生比隣接巷每論詩輒爲首屈一指今序中引以爲重蓋實錄也諸詩伯持論近多以朱駕唐殆爲膏附唐人者矯枉去唐漸遠山海之喻寓有微尙知已能不河漢其言乎風便翼有以發吾覆也使者索報對客草勒不一令叔令兄并聲致貴世令尙翁已爲桑雨老頌之矣

尊詩入十子詩畧者不得不照衆式倘刻全稿必須宋字筆畫畧重或照錢宗伯杜詩箋注款式用十一行爲古雅賣船詩僭改字句不識可有當否附及之敝友梅



耦長心嚮有素附刻詩請正幸查收

朱檢討藝尊

曩者荒文應命未足頌揚太老先生萬一乃拜嘉厚幣寸心含慙至今飛光如馳三葛兩易遙知讀禮之暇撰述益多正眊星騶北來用慰契濶捧接手教知尙需時然得筆疏千里正同覲面矣弟迂拙性成狗祿初非本願奈有司敦迫遂入京華滿擬放還自視人地正如薛歐蟲達老先生乃以淮陰見方何敢當即拙稿尙未災水統容晤時面請指教太老先生前不敢率候鶯俟還

顏氏家藏尺牘卷二

十四

海山仙館叢書

朝三薰晉謁先祈叱致憑穎惟有依馳弟名箋肅

潘檢討末

憶自甲寅之春獲攀風範隨蒙特開綺席竟日論文雅誼隆情勒諸心府片帆南下戡影衡茅筆硯荒蕪鱗鴻稀濶嗣聞先生奉諱歸里恨在遠道不獲磨鏡自前翹首東蒙但有企切煙波釣徒一竿自足忽塵啓事駭若爰居移病不從敦迫就道本擬躋踏京塵便行拂袖取路鄒嶧之間當信宿高齋謁孔林觀禮器而歸不自意見縻於此被斷木以青黃資越人以章甫不習不堪當

可奈何遠惠手書具感垂注素鞞旣除所望夙駕鋒車  
慰答羣望何尙棹遲林澤令人作天際真人想也拙稿  
未經繕寫杪冬小刻二箋附覽聊以見志不堪供撫掌  
耳合兄老先生計已脂車北上不另通候草草勒復不  
盡依馳弟名單具

毛處士先舒

伏讀大學解謂格物乃却心中物累又云物是凡事物  
情欲之蔽吾明者格謂却之不使蔽吾明知謂吾心之  
虛靈致謂推之以至其極是義精極與鄙見恰符雖與

顏氏家藏尺牘卷二

五

海山仙館叢書

紫陽註格物不同而與其註大學之道節意頗合此真  
千古定論也恐近佛學而故避之政是後儒通病理本  
相通何庸立異虛心折衷深用歎服文釋疏義真足爲  
學者之津梁中論字法體用極是但此止可概其常云  
耳若文字入變處又不可以執定法今只就複字者言  
之如說命唯事事論語立之斯立大學上老老上長長  
原道人其人均此一字也上皆是用下皆是體老子道  
可道名可名樂記物至知知均此一字也上皆是體下  
皆是用又如孟子彼長而我長之彼白而我白之上長



白皆是體下長白皆是用白馬之白也長馬之長也上長白又皆是用下長白又皆是體類如此等豈有定法音正一編細入毛髮昭哉發矇其所云聲別清濁卽周德清中原音韻之分陰陽也但德清止於平聲分之耳愚又嘗細按四聲俱有清濁而平去入三部聲清濁處卽成陰陽唯上聲一部聲清濁處不成陰陽卽如大著所引平聲通字爲清同字爲濁上聲董清動濁去聲凍清洞濁入聲篤清獨濁然東凍篤皆是陰聲同洞獨皆是陽聲唯董動二字雖分清濁難判陰陽矣此愚所謂

顏氏家藏尺牘卷二

去

海山仙館叢書

上聲清濁不成陰陽者也又平去入三聲皆悉具清濁而上聲又或有清濁或無清濁如董動二字有清濁者也若清聲之風捧諷福濁聲之逢捧鳳伏則上聲同歸捧音矣無清濁也又若清聲之邕勇擁郁濁聲之庸勇用玉則上聲同歸勇音矣亦直無分清濁者也率略摠義未知先生以爲然否或肯更賜詳示而教之乎匡林格物問答韻學通指韻白四種前奉去併望指訛尊者二帙僭筆附璧不具薦林鹿老事未知已妥否書乃小兒所寫今親筆附勒亦防將來或有僞託也又白

數歲前初承枉駕者屢促膝論文深領教益至今追味  
清旨不去於心茲者先生領袖羣倫人欽水鑿金衡玉  
尺一代崇瞻弟聆緒風亦復欣仰又得舍親洪中令書  
知先生於弟有說項之雅卽浙中當事處亦蒙過相推  
譽知己之感真無以爲報稱地也愧謝愧謝近小兒忝  
有卑職赴選入都特令恭趨龍門奉候近祉小兒菲材  
不足當門下趨走之末吏唯先生量同河海不擇涓流  
稍加噓拂使得培風萬里其餘凡可指示之處尙祈不  
惜有以教之文併一帙尙未成書題尊像語已借重其  
余處士懷

先生榮任金陵時懷適僑居吳郡深以未識荊州爲恨  
前翁山兄往婁東奉訪卽致渴懷昨在禾城鹽臺成愚  
老云台駕在禾急於圖晤冒雪鼓棹到北關外晉謁而  
先生已去禾來蘇事類剡溪可勝惆悵新春日歸家見  
尊票卽趨候又不相值真昌黎所云相需之殷而相遇  
之艱也頃承大教如見顏色容當盥沐抽毫敬題以報  
昨梅隱僧筠士叩見一二日內尙於菴中求作支許之



遊也草復修翁先生晚弟懷頓首

王考功士祿

承老門長兄弔奠唁慰情文周摯昨雖踵門稽首以謝未足盡感悰之萬一也再此佈謝不孝弟月初卽奔喪東矣倮然衰絰之身誼不敢過別從此離居不知何時復得奉教左右也言之漉然啓者愚兄弟雅辱至愛不同泛泛舍弟事望老門長兄留神照拂不孝目下精神憤亂語不及詳其間曲折已囑北山舍弟臨期一一奉商矣外告母文一通附呈台覽臨筆曷勝戀切

顏氏家藏尺牘卷二

六

海山仙館叢書

王進士士祐

睽違道範已再易冬春矣懷想高誼無時暫釋昨遣小兒之汶上迎路雲路年兄特脩小函令之上候乃匆遽未及奉撰杖屨茲路年兄西旋之便附此奉候興居弟去歲以荆人抱病屏跡半載首秋一入春明比旋里而荆人之病已入膏肓矣不匝月而有炊臼之戚事旣倉皇且值歉歲周章之狀莫可名言目下擬爲吳越之游然尙未審成行何日也附及者舍親輩有欲求尊府贊禮劄付者屬弟奉懇茲列名一單祈老門兄鼎力慨爲

轉求見惠并求發一移會文書投鄒平縣公處則叨榮  
無既矣伏惟留神臨穎馳切澹園先生諸令弟年兄統  
希叱致拙刻二冊附呈大教并正澹翁先生

伏處寒廬與先兄相依爲命家門不幸先兄又殉母以  
死弟視息雖存生趣都盡知己如門兄臺先生應爲扼  
腕太息也前承遠賜弔唁敬此申謝先慈襄事擬在來  
春徬徨莫知爲計專有所商祈進小价面稟其詳萬望  
留神真不啻麥舟之助也臨穎朔切不盡

王尙書士正

顏氏家藏尺牘卷二

九

海山仙館叢書

兩年兄之奉高堂而徒跣歸也同人仰觀哀戚之容不  
勝懸切若同志數君子夙昔樂數晨夕者分襟以來益  
俛俛如有所失則弟之懷抱可知也長涂舟車屢事得  
不勞頓否知目前正營窀穸幸稍節哀痛以慰慈闈是  
所顛望弟三四月間卧病幾四十日承委作傳大畧已  
就尙須一芟削然後脫稿不至久稽詛老隨卽致之渠  
意必待賢昆玉一札到弟云方讀禮未敢通書都下是  
以屬弟口致詔老性素硜硜或近申作數行候謝之兼  
索文字弟好從臾之耳如何如何至十子之刻葉慕廬



林澹亭宋牧菴諸君皆已刻竣惟大集未梓殊爲憾事  
且年兄實首商此舉詎可反遺而登他人苦塊之中特  
自已廢業若友人代選付刻義初無傷所以集稿卽寄  
曹實庵田漪亭刻貲先予五金餘襄事後全寄之亦無  
不可近陳椒峯董蒼水數君入都慕此舉皆有此意而  
峨嵋書言椒峯尤力然弟獨意在年兄者不特以首事  
故且愛重詩品不忍捨去耳并此附商不盡念切五言  
一卷說岩不知收之何處屢索不可得也

比有數行上候孝履旋拜手教伏審尊候安吉哀毀之

顏氏家藏尺牘卷二

三

海山仙館叢書

餘未至滅性差慰遠懷承以老年伯傳見屬久已脫稿  
以候認老文字同發而渠以日講每日五鼓入直以是  
遲遲今已取到并同札一通及拙作統寄上認老當代  
作者其文足以備國史之采而弟愧非其人也以素附  
金石之契又忝通門子姪之未不敢辭以固陋惟裁訂  
而用之幸甚五言領到大事畢尊集當早寄以成完書  
匆匆不盡溯切

大阮先生歲前返里弟時正有周闡之役匆匆數行奉  
候未得少申款曲迄今爲歎想老門翁相諒於形迹之

外也自仲冬閉閘挑河三月無一船往來缺額竟至六  
七千金茫然無補救之術將來知能與吾修老從容晏  
坐南宮署中卽意外之幸矣泥塗中閘老門翁分校禮  
闈得士必爲一時之冠欣慰無量茲廣陵做門人汪舟  
次楫者蓋代才也詩文書法皆足縱橫十萬里與蛟門  
兄弟行少爲同學其胞兄長玉亦擅風雅今有不獲已  
衷言弟若在遠而幸老門翁之當事也特以數行屬蛟  
門面悉千祈吾兄留意焉舟次兄弟爲東南領袖吾兄  
又當代君宗聲氣之緣知不煩弟之覩縷也容面頌不

顏氏家藏尺牘卷二

三

海山仙館叢書

盡

自先生銜恤而歸也歲忽再易雖弗獲時通音訛然每  
晤二孔昆玉必候起居顧恨不得其詳徒深耿耿耳使  
來捧誦良書頓豁積臆如共西窓一夕之談聖林聖廟  
碑版向曾彙成一書否大刻拜教蕪陋之詞愧未能闡  
大節於百一乃儼然與詛老如椽並列汗流浹背矣承  
諭真仁人之言中心藏之但疎賤力不逮此耳 主上  
聖學日新右文崇儒度越前古向以纂修入直 禁中  
竊見便 殿讀書每至乙夜勿論他嗜好卽游幸亦絕



稀少此平治根本也第恐諸司奉行未必盡體 上旨  
耳如何如何先兄節孝錄一冊蜀道小集一冊附呈覽  
教承委二扇完上書跡自勝本色不必苦究真贋也一  
笑一笑令兄老先生致候臨啓馳切大阮先生未專字  
爲叱名又行

入春以來遙憶孝履無恙祥琴在卽佇望啓事不獨慰  
中朝士大夫之望亦竊幸晨夕析疑吾道可以不孤也  
忽披良訊如聆警欵兼知老伯母太夫人納福欣慰無  
量吾鄉三冬無雪流冗載塗弊邑左右已有傾村落而

顏氏家藏尺牘卷二

三 海山仙館叢書

逃者聞青兗之間殆有甚焉頃者撫軍疏至臺省交章  
特遣少農速往賑救德意可謂至矣第聞濟東數邑不  
在賑列反派車百兩輓粟而東是只尺又有苦樂之不  
同矣承寄孔林碑刻謹拜頌訖唐宋碑名蹟最著者更  
搨數本惠示尤所望也尊集頗與愚山快讀燭屢見跋  
然尙未暇點筆今愚老序成先寄弟稍遲從孔年兄處  
郵上何如令叔老先生甚軫遙念尊候想已清勝冬間  
十家兄在邸舍偶同和友人五言數章合刻一卷今上  
二冊聊代晤言耳博學諸公 御試約在此月下泮史

局似在必開但未知如何位置留用多寡李天生昨殷  
殷奉訛渠已以母老具呈貴衙門矣家君托庇安善第  
臆底又有十家嫂之變不知寒家何以不幸至此承垂  
注謝謝臨穎馳切不盡百一令兄先生以名致候又行  
暑中未敢趨晤想在鑒原也貴州有孝廉越園者欲復  
姓江此子乃弟與鞠觀老之舊交聞貴衙門有沙公者  
與年兄最善祈詰朝入署一爲開導之感不獨在江子  
也容晤不一其原札附覽可了然矣

卽吉已久日望旌北來尋曩昔文酒之會聊慰三年

顏氏家藏尺牘卷二

三

海山仙館叢書

調飢之思使來得手書乃知復有轉假之意爲之惆悵  
都城人海同志寥寥不卜何時始獲續西園清夜之游  
也大集敘尙未脫稿遲當奉寄敝邑兩年奇旱今歲麥  
秋已大無而五月一雨之後又復杳然秋禾大抵亦如  
貴縣矣加增不訾都中食指日苦不給進退出處一無  
可者計吾兄山中尙少此一段拮据耳吾鄉今科館選  
六人頗不爲少而博學宏詞止有諸城李渭清一人其  
餘大半皆江浙間人昨有偶爲邗江友人題墨菊一絕  
句云由來苦節本難貞莫向東籬問落英徵士今年滿



京雒不知何處著淵明吾兄見之定爲一軒渠也諸故人惟愚山朝夕聚首史館尙未開似尙候監脩先生耳山史飄然還山真如鶴立雞羣可敬可羨霽老前暫歸里弟初不知未得晤送想時時相見幸此致爲囑臨穎馳遡藝圃倡和詩一帙附正孔子家語知聖府有藏版并顏氏家訓各惠一二部漪亭慕廬澹亭皆滿志而皆不取取者諸君子中止峩眉一人改編修也

前尊使回有數行上復達記室久矣再拜手教自當留心當事方有棘闈之役一二日告竣相晤卽致之不忘

顏氏家藏尺牘卷二

三  
海山仙館叢書

也令兄老先生統此奉候未盡令叔老先生比已清勝未敢尚候并煩叱名又行

不孝弟罪通於天間關萬里慈母見背三月毫不聞知及匍匐奔喪已逾卒哭之期悲哉爲人子三十九年生不能養病不能侍臨危不能祖舍殮聞永訣一語縱復偷生人世何以爲子何以爲人言念及此肝腸迸裂老門兄素相關切尙亦憫鮮民之遭而爲之南望揮涕乎前在蜀有小力北行曾與次兄同賦小詩以將遠念并囑家北兄與門兄細商一切想荷留念焚焚草土中惟

望天際故人不忘夙昔啣結之私何日忘之同署兄弟  
統爲叱致不敢輕以不祥姓字相通也周李雅諸兄尤  
道念切之意合肥夫子董堂翁并爲稟致不盡憑穎涕  
泗不知所云不孝弟泣血上

委扇書舊作呈正弟不工書十餘年久不書扇故倩代  
筆然亦殊不工也目前磨勘大家自存寬大北闈葉舒  
崇葉淳二君乃詔菴太史之子姪與弟又有師友之誼  
其文久爲世所稱道閱時幸爲留神并祈致奉倩年兄  
更感不盡

顏氏家藏尺牘卷二

三

海山仙館叢書

彥老之語已囑轉致否蜀道小集祈擲付有二三同人  
屢來宣索故也餘面悉弟正頓首

家兄病痊赴選文書一件祈老門兄攜付貴衙門司務  
廳爲感家兄偶他出故未專啓并惟鑒之弟士正頓首  
昨勞重謝謝扇五柄求老門翁爲捉刀人拙作皆在八  
家詩選并蜀道小集中煩一檢閱塞鼻書之可也容謝  
不一弟士正頓首

幼華舍弟又有一字來專人奉覽明日尊駕入署祈爲  
細細一查示之其情迫切吾輩關切之誼門兄自有同



心也餘未盡小弟士正頓首

晴峰刻下送扇至細觀之乃乞隣非親書也甚以爲憾  
只得送上詩則真而字則贗頃已告過定不罪也柯素  
老諸箋望卽撥冗書之以屢來索故也又蔚州魏先生  
爲其令親李君徵詩一箋再煩一代萬弗效晴峯之乞  
隣乃至感也幼華舍弟事明早入署惟留神又祝弟士

正頓

力臣一對聯敬乞老門兄爲弟捉刀刻下卽賜下尤感  
餘面頌不盡莫忘稽古力須用讀書人題贈力臣年道

顏氏家藏尺牘卷二

五

海山仙館叢書

兄弟士正頓首

弟一向忽忽如失濶疎人事令叔先生此來竟未一候  
接譚笑昨始記起遣問聞已於初六日歸里矣歉甚無  
似有家報幸叱名切致不安爲祝三扇欲付季角明早  
南寄者求大筆代書寒天呵凍萬弗厭其瑣瑣也統面  
頌不一先生亦老輩之一也何見疑耶一笑期小弟士  
正頓首

所事承留神謝謝更望時爲一問示之爲荷陳宋二公  
壽詩各一求大筆增重必明日卽得方妙以宋箋來索

立候上屏也容謝期小弟正頓首

楚詞昨附上矣一扇寄汪鈍菴惡詩煩大筆一書容謝  
南去人明早必行今日便望擲付爲祝大阮先生叱候  
不盡家兄士良其名已入湖北單確否示知期弟士正

頓首

數欲奉訪皆以他故中止昨見升六兄極口吾兄新詩  
以爲無字不干鍾百鍊弟急思一讀特此奉借底本不  
必俟別抄也旋即璧上不盡外附訊者聞督江撫暨大  
司寇三缺有消息否示之弟士正頓首

顏氏家藏尺牘卷二

三

海山仙館叢書

幼華極感闕切之誼再託致意云急欲奔喪不知可不  
候說堂否呈子明早到貴司祈諭主者卽立漢稿至滿  
稿亦望鼎言促之其翻清字相公應有常例不可省者  
望隨便許之示知以便送上渠不便親筆作字輒此代  
達不一小弟士正頓首

昨一聯一扇如已命筆幸付去手如未書其扇上煩爲  
寫眉州謁三蘇公祠長歌以渠原索小行楷也容而頌  
不一弟士正頓首

晨遣長班至貴署值問兄上堂不知相君事如何議已



上本否幸示之秋暑尙酷多勞筆墨已自非理况以惡  
詩屢強塞鼻乎但連日頻煩晴老而綸老又東首忙甚  
送許竹隱一扇敢再求法書詩凡五首小行草最佳但  
所用佳筆書之統容走頌不一古詩紀或詩乘詩祈借  
一查小弟士正頓首

弟日在愁城中竟不知老年伯母久來就養昨與升六  
談次始知之深慚疎節新正當專申登堂之誼也并叔  
委一聯元旦欲用敬煩大書不盡李杜汎浩浩韓柳摩  
蒼蒼杜樊川句書爲并叔先生期弟士正頓首

顏氏家藏尺牘卷二

天

海山仙館叢書

綾紙三件再求法書增重但惡詩不可耐昔人以艾塞  
鼻然後書之亦一法也何如容謝修來先生功小弟士  
正頓首

聞年兄今日入署不知昨事公議云何弟因餞張韞老  
未曾入署云云俟明日查報可耳卯墨乃寄家中舍姪  
小兒輩者初六晨卽遣人故未附到滿洲同宗做影一  
張幸乘暇爲書之容謝弟正頓首

稿案錄呈必由衍聖公咨乃可敬聞做格祈留神發下  
弟正頓首

昨勞大筆再謝樸庵宗兄三令孫以扇屬書敬再懇老  
門翁捉刀容面頌弗一但書號可也弟正頓首

伸苻寫真奉上小詩求法書增重容謝非一弟士正頓

首

昨奉勞筆墨太多深切不安中寄梁曰緝一首欲向老  
禪一句欲字本是擬字祈爲改正不盡容面頌功小弟  
正頓首

小冊奉求大筆或新篇尤妙或臨帖亦佳但祈速賜今  
晨太宰郝公返道山愚山濮陽同一悼惜也不盡小弟

顏氏家藏尺牘卷二

五

海山仙館叢書

士正頓首

銅鼓詩一首藉法書爲重祈出署時拂冗卽書賜下感  
切感切前尊扇已屬大木書之大書夕以至則尊扇朝  
以至矣何如何如畫冊二件并書惠教小弟士正頓首  
大木已致雅意矣本房門人朱兄乃張悅九年兄內弟  
頃曾進謁惟鑒照不盡統容面頌

敬啟者小女病瘡欲製膏子急需古墨二兩念先生處  
必有珍藏最陳者特丐見惠容面謝非一弟士正頓首  
令兄老先生處亦煩一覓又行



久不晤教甚切企念陳長人名奮新者時文有黃陶菴之風向以教習考居知縣第一與先生亦有及門之誼昨在部應試以久病止作一篇惟先生憐才心切一留意焉囑囑

宋尙書犖

長安晤對大慰生平揮塵之餘山川增色不意老年臺以大禮南歸同人殊爲慘鬱坐無車公蓋不知經幾番惆悵也弟因叨補秋曹日親讞案國是民命所關心力交瘁疎候之愆方無以謝故人而殷殷翰教益我慚惶

顏氏家藏尺牘卷二

三  
海山仙館叢書

至於奕世忠孝之風備於傳表且出詔菴阮亭兩公如椽之筆是人以文顯文以人傳真爲天壤不朽之業當什襲藏之以昭後禳千子詩略一刻所闕者大作耳事襄痛定之後又當以文章爲繼述幸速致以慰選壇之望舍弟以五月初旬回部緣應接之苦未能裁候統此申意令叔先生及震浮垣三諸公前乞致弟相念之切嗣容崑啓拙詩附呈教正臨楮溯洄不旣

王給諫又旦

向在都聞訃承老年臺先生軒車枉過辱賜誄章且過

蒙照拂愛踰骨肉雲天之誼未敢一刻忘也不孝又且  
七月十三日抵里九月六日乃窆先君於祖兆此時日  
守墓田坐對松楸慘澹觸緒傷心不敢備爲知己道也  
且歸家之後已將奔喪始末具呈本縣想應達部倘蒙  
仍賜矜矜草木有心將來未有不捐糜圖報者也茲因  
便鴻崙謝前誼併候近禧仰邀崇鑒五中如絲不敢他  
及十月十四日在疚子又且稽顙再拜

汪主事懋麟

伏覽高文辨駁盡致義理愚所未解而文瀾則壯濶可

顏氏家藏尺牘卷二

三

海山仙館叢書

喜時賢不能望見當於王方之間求之略商一二字年  
兄不以爲妄否弟懋麟頓首

長夏退食定有餘閑前奉求小冊幸卽書賜爲寶容晤  
謝弟懋頓首

畫像久滯若不得佳思夜來率題長句未審當台鑒否  
昨有小札諒蒙年兄存注不更贅小弟懋頓首

覓得蘭香一盒奉上希照小冊求拂冗賜書外梁世兄  
冊葉並求便揮數行卽賜下乃夫子屬也曾晤陳君探  
之否弟懋頓首



今日說當若何乞示梁世兄卷子求題數日內欲攜歸  
恆山也弟在阮亭夫子處能枉駕否小弟懋頓具

長歌之妙至此乎直駕少陵餘子不及也幸卽書卷以  
小行楷爲荷勿用大圖書切切弟懋頓首

昨勞玉爲謝承召自渴欲趨教奈是日有吳五老與竹  
巖家兄兩席恐不能細聆塵誨願以出月初何如特謝  
小弟懋頓首

適聞舊字之呈貴司已駁出令本人於原籍取印官結  
狀月盡方到若果然則十月初方到選司月半後方能

顏氏家藏尺牘卷二

三 海山仙館叢書

補此昨相晤年兄何未言及耶祈卽命吏人確查見示  
屬在知己敢此屢瀆

連候起居未得晤弟咨文復詣尊前又三日矣乞年兄  
鼎力卽達選司爲望恐又遲遲落後也屢瀆幸恕容晤  
謝不一弟懋頓首

家兄誥命重荷清神選司果有商酌之意正在講論序  
題求稍緩俟定後再懇弟事並求年兄速照是感

曹祭酒未

別時止覺心酸相隔六日已覺心痛過後不知何如弟

在部門止有師友之樂今此樂不可復得想老年兄日  
內必與綸老實老相聚必歎息此人之去必計其舟行  
所至之程爲之南望咨嗟亦知弟無時無處不北望神  
傷想年兄輩聚首時即邀庇於十七日發潞河十九日  
過關今尙需滯津門待同人贖取老親衣飾一二種人  
到卽長行矣德水倘值方山當託附候伏希老年兄起  
居自愛下慰遠懷臨楮荒忽不盡欲言小弟禾頓首七  
月二日舟至桑園京師之人始至此去至德州一日到  
彼不及再候連日酷熱大集序尙未草就當俟稍涼成

顏氏家藏尺牘卷二

三  
海山仙館叢書

之蘇詩一本多方檢出奉上宋詩奉去都全但被惡札  
亂塗不堪入大目奈何有南去使人望以近况示知又  
行不一鄭山老趙玉老不及另致求道意再行

弟奉親北來已逾一載日望老年兄早來聚首飢渴之  
思形於夢想往年留滯有弟兄之樂而不勝庭闈之念  
及此重遊又不勝朋友之懷天倫樂事難全如此讀手  
教知脂轄尙遲老年兄宦情素澹竟不念我之離羣索  
居矣人品雖高其如寡情何哉弟樗櫟之質年兄素知  
使爲韻語實非所長 御試之日既不肯效人塗脂抹



粉又不能拙速成篇草率畢事而字跡之改竄已多  
聖恩汪濊仍見收錄曠世之恩愧無一稱不特俯媿章  
服亦且仰慙知已矣至於此官原是戲場今與諸君同  
搬塊塼嬉笑怒罵皆非本色不過供壁上觀一笑耳家  
兄潦倒異常實緣家難此非文字之過近亦頗能作達  
子綸井叔澹亭暨浙中李武曾皆一代之才試而不售  
時時爲之歎息椒峯竟歸尤爲可惜近作急欲捧誦詢  
之家兄茫然不知不審今在何處俟見後卽效筆墨之  
勞弟舊學荒落日下雖無酬應然亦不能作佳語若窮  
思著述千古自在耳一笑一笑老親幸粗安并謝草草  
附候暑中惟起居節宜爲禱不盡

顏氏家藏尺牘卷二

書

海山仙館叢書

一別便及三載老年兄忽當大故弟在三千里外不能  
隻雞斗酒一哭几筵去夏身至都城始知抱歉無量正  
擬覓便奉候興居忽荷枉緘令人媿慙欲死承諭以誅  
辭見屬此子弟職也况又荷年兄知愛之深不敢以不  
文辭但目下匆匆應制必俟 御試後勉力爲之恐不  
能揄揚老年伯之萬一奈何奈何聞年兄已卽吉想不  
日可以治裝入都握晤當不遠老年兄近著想益富郵

中望寄數篇以慰馳仰小詩書扇呈笑聊表相思殊不成章也使乎倚待草草不恭并希原諒不贅

頃奉謁日中毒熱不敢求見早晚俟微涼請教弟從未填詞偶學爲之粗鄙可笑敬書以供捧腹不一小弟禾頓首

連日失候渴想渴想椒峯一事殊不可解雨中偶成二律博粲康老遂作古人風流可念令人興殄瘁之歎昨成長歌一章極誕妄可笑已送去糊壁年兄過彼處當見之也不一

顏氏家藏尺牘卷二

三  
海山仙館叢書

前擾謝謝明日邀貴座主一談敢借卓圍二條椅披坐褥各六用過卽奉上屢瀆自覺可憎然知老年兄不厭也小詞成之數日憚於手錄頃因作字遂發興書政幸斧正是荷不一小弟禾頓首

連日不面渴想渴想弟歸計已決欲覓字子老省親呈稿懇老年兄命貴役一查錄出弟行期不出五月萬望留意容叩謝不一小弟禾頓首

昨晤家實菴知綸老護惜扇陞以弟所佩爲薦弟最寶者四枚三歸實庵一爲綸老所竊今存一鼓實不佳奉



去清賞免年兄復作綸老伎倆笑笑具題之稿聞家公  
昨已力催幸再向載老一促弟早得歸見老親卽仁人  
之賜也不一弟禾頓首

具呈二十餘日題請杳然懇老年兄一促之弟得早見  
老親一日皆年兄之賜也此懇小弟禾頓首

葉主事封

老年兄至性過人致哀盡孝憶奉送時悲容深墨相視  
含悽不忍作一語別來忽忽遂已歲餘弟于去秋薄遊  
江左今春始還道中瞻言鳧繹緬想故人家在其間不

顏氏家藏尺牘卷二

三

海山仙館叢書

得過從徘徊久之頃接手翰具知孝履平安是慰讀太  
老伯先生表傳令人起敬慕其文亦清真古淡非苟作  
者年兄思顯其親而必擇其人爲之表章斯誠可以不  
朽也弟一誤失足需次無期自知百不如人空爾淹留  
逐隊當於秋杪暫歸敝廬無足道者前於阮翁處讀年  
兄古詩一卷高蒼沈鬱迴絕時流餘體何竟不見寄同  
學翹候已久此似於讀禮無妨也拙刻先成竊慙糠粃  
頃賦一篇並呈教正闕里石刻曾裒集否其漢魏六朝  
碑碣存者乞便中各搨一紙見惠爲感肅此附復不盡

願言五月二十一日弟封再頓首

十九日接手翰及寄碑刻具感不遠垂注展讀摩挲如獲拱璧謹謝謹謝流年又易深憶停雲老年兄讀禮之餘留情筆墨承示佳藁容從實菴兄所取而讀之計尊服將闋入夏便當赴補倘弟彼時猶滯此間則促鄰細論諒有日也弟本無學問謬竊虛聲邇復苦貧氣盡舊業益荒蕪不可治且悠悠久待而此中才糶襍頗有不自愛重以奔走貽笑大方者將來未知作何結局弟自揣荒疎迂拙加以福命不齊豈有幸耶遙辱闕念徒增慚汗耳聞貴鄉饑祲貴郡不審何如顧甯老金石集記年兄向曾見之否甯人博雅精核當無所遺而據其所開在曲阜孔廟者五代以上不滿廿碑其信然耶今錄呈備查其未有者隨便補搨未敢得隲更望也今日赴大嵩傲先生宅陪弔恐使者逆旋草草勒復未盡所懷正月廿日弟封載頓首

戊午獲奉良書並墨刻具感存注裁復之後鱗鴻遂稀庚申詹麗朋舍親還自錢塘云得觀眉宇兼辱寄聲中心藏之時爲馳企此知榮補已久先生清通簡要雅望



依隆內晉崇階自計日俟之耳憶曩從阮亭先生所借  
讀尊著七言古體一卷頓挫深穩極有杜韓之風聞後  
在南中已鐫全集乞便中惠寄一冊爲幸弟自己未罷  
歸困於薪積頻年奔走無濟饑寒今亦甘老江邊而齒  
疏髮變已無足言矣懇者弟在西城之日恭逢十四年  
恩詔應得誥命原領執照留楊晴西舍親處於去年  
正月內轉付內院供事李贊朝比時李云已寫只候彙  
齊請寶送部而舍親匆匆赴開封之任頓成古人不及  
領到稽延至今又逾一載幸值先生當事敢求垂照查

顏氏家藏尺牘卷二

三

海山仙館叢書

明發領付做同年吳巢薇舍親轉寄存沒之感銜結以  
之也風便肅候鴻禧並附虔禱伏惟留意憑穎顯瞻近  
刻一冊寄呈教正不盡八月十二日弟封再頓首  
林觀察堯英

十年壇坫夙奉敦槃弟以飯甌細響荷老先生年臺收  
之藥籠之中思欲執弭追從而予告旋里末由昕夕樞  
趨座側而琅琅鈞天震聳人耳沐浴誨益固已多矣昨  
聞玉節北指海內鳳麟仰藉璣衡蒐拔媿弟鹿鹿風塵  
懷鉛滋懼惟是冰兢自矢所識者皆繩樞之子期於提

命之意稍稍靡負引領台慈頻垂雲霓承示佳賦貳篇業已遵爲玉尺矣尙容崙勒馳申燕賀肅此奉復臨啓可任神馳張老先生札俟到汴之日報命附聞

謝郎中重輝

憶昔都門旅邸過從朝夕聚首恍然如前日事而居諸迅駛不覺兩易寒暑同調兄弟紛飛南北契洽如吾兄亦不能一楮通候疎慵之罪真擢髮難追矣使者來京備悉起居知襄事之餘觸緒悲愴殊爲不堪然人生逆境勢所不免所望節哀自玉以俟側席之求勿徒過爲

顏氏家藏尺牘卷二

三  
海山仙館叢書

悲傷也至弟七載散曹閒懶成癖一旦誤投網羅抱牘案頭久成俗吏意欲乞恩東歸謀爲遂初之計而三兄弟堅不肯放奈何奈何諸家詩已送實兄巢寄拙作二首就正大方幸筆示爲望使返空函肅候不盡不盡曹郎中貞吉

自春來三接手教因乏便鴻尙無報章知年兄必能相諒也小兒同知底事全仗年兄餘光雖出當事之惠猶解推也且適館授餐有加無已弟甯作石人耶敢不終身佩之夏斗老騎驢覓科不謂後時匆匆一言不獲再



晤矣輦下詞客自然雲集但崔羅之門從未枉高賢之  
駕其有素交者投贈亦復寥寥弟自分迂腐陳人正未  
敢沿門投刺若復縱橫其間面皮三寸矣年兄尙何取  
於弟耶著作極力拮拾猶不足二十種盡以相寄以爲  
引睡之具可以爲噴飯之具亦無不可也佳篋領到但  
恐無如許善書者謹留以待時或托人轉求亦可方暑  
惟冀保攝爲道自愛使旋順候興居並闔宅福履不旣  
盛使來又接手教兼詢近履知闔宅平善爲慰年兄卽  
吉在邇想轉眴可晤芝眉矣別諭原屬過慮然已托髯  
公諄致差不辱命也月來諸博學皇皇得失佳篋未得  
悉徵俟此局小定可以彙寄矣諸容另悉不次不莊

向乏便鴻遂疎音問然此心無日不在左右也人回敬

候年伯母起居並闔宅福履我輩握手之期或在夏秋  
但弟貧病之餘筆硯荒廢塵土面目真無以對故人矣  
奈何吾鄉災荒之狀不忍深思不敢多言剝膚之患非  
杞憂也詩餘一道向因少事借以送日結習所在筆墨  
遂多其年錫鬯日督付梓所以未卽災梨者作者林立  
羞事雷同一囊無餘貲難修不急二心懶憚於檢校三

草草結構不敢自信四侯年兄入都後再加斧斤方可  
出以示人耳云何詩畧亦半年未刷印敝笥中搜得一  
冊奉寄俟印出時不妨多帶耳佳筭日爲在心所以遲  
遲至今者因入冬宏詞之士方大集歲底始得散完又  
最難收日來因考期在卽諸公鍵戶不通人事不忍亂  
其文思故交卷不多先寄去十四柄內鉅公詞翰尙未  
數數也俟徵完再寄久不晤阮兄尊集尙未得讀俟小  
暇當過彼寓細觀耳令弟年兄寓最遠雪後道阻未及  
一訪看花在邇頌益正有日也意緒草草筆不盡聲

顏氏家藏尺牘卷二

四

海山仙館叢書

連日未晤渴思怒如啓者粗紙一幅求年兄小楷一段  
將爲模楷懇卽賜爲感前諭已致之舍弟矣容面不旣  
弟貞吉頓首

數日來未晤矣舍弟昨有信來云去年讀大作三紙服  
其秀絕更欲求全集一觀不知可賜教否又欲購廣平  
申鳧盟集一部但弟與隨叔太史無素併煩年兄鼎力  
一求何如示之容面道不旣弟貞吉頓首

三年之別計秋高定可握手不謂年兄又以假請也令  
人悵悵大集曾自阮兄處攜來一讀高山流水水實移我



情但阮兄尙未鉛黃弟亦未僭妄此時尙在阮亭案頭  
云已有字寄去矣徹邑二麥不登有如貴郡幸三伏雨  
足秋禾似茂但未知將來何如耳同人濟濟深慶連茹  
此古昔未有之盛我輩生際昌期目觀盛典爲榮多矣  
正不必廁身其間然後愉快也云何云何弟胸次枯槁  
閣筆有年間有拈弄亦如秋蛩夏蚓絕不成聲承年兄  
見索謹以一帙請教乃吾愚山夫子與李武曾評定者  
年兄泚筆抹之便中仍擲下何如扇又得八柄寄上所  
餘不多矣此時群公袞袞更難仰求容徐圖之耳老母

顏氏家藏尺牘卷二

聖

海山仙館叢書

藉庇粗安但比來善病令人牽縈年兄何以教之也使  
旋敬問年伯母起居並閤宅平善草草不旣欲陳

田侍郎雲

伏暑焮炎渾身是病勉強視事煩苦支離申江告竣過  
赴姑蘇十六七可歸句曲年兄肯同萊老枉駕作快聚  
乎物色佳麗當有同心弟所樂觀厥成也蘇茂宏婿家  
亦在秦淮爲此舉三公坐而論道誠爲風流佳話又大  
可妬也溧水上元謹心識之萊老寂無所遇何以處此  
廣文諭訾無狀府詳到時當斟酌寬之餘不具及

南來以得晤年兄爲快而竟不果從此奔馳兩江之間  
聚首良難望惠然來句曲度歲三茆峰色未必遜二洞  
庭也竚盼竚盼邗上事竣蓋難言之矣盡在尊使口中  
柔艣輕鷗又簿書鞅掌草復不多及

回句曲積勞疾作十九日強起赴澄江視事百端棘手  
撐搯爲難萬念俱灰退歸何日前所云云不復作幻想  
也秦淮風景甚佳暫避炎熇容圖快聚萊老亦留住爲  
禱羽使奉候伏枕草草

弟平生要緊關頭在此一舉我兩人雖有姓氏之異不

顏氏家藏尺牘卷二

望

海山仙館叢書

啻胞乳之同尙俟諄諄贅語耶舟次池陽聞王明老已  
返棹真千載一時不可錯過從來成大事者定有素心  
熱腸好友天然湊合其間不先不後而遇君正今日之  
謂矣一切委曲幹旋內而撫公外而臬司許多妙用大  
費精神大費唇舌匪易易也非細故也專盼好音千言  
萬語不能盡如明老不卽抵皖年兄多住三日面商禱  
禱明老處另有專啓

十二日抵滁豐樂亭不知在何所真同俗吏也穆倩圖  
書望時一促之乃可得耳年兄見惠一匣又持去爲舍



弟鐫刻乞切致爲禱詞林寫大字不比部郎或宜選其  
大者年兄斟商之爲善弟皖道詩一冊批抹完卽付來  
役祝祝餘不旣

五日京兆復遇兩上司新任命之不猶又復何言星卜  
家皆云官運踴躍信或有之年近五十鬚髮半白從此  
入山唯恐不深但事多梗阻未免周旋照應心血俱枯  
苦人苦人使至接手教感激之餘因而泣下平生骨肉  
知已年兄外再無人矣大冶意出於誠受庇良多今迎  
至維揚渠已抵淮上晤後卽返甸曲渠受事之日亦卽

顏氏家藏尺牘卷二

蜀海山仙館叢書

弟交代之期也相待若何再當馳聞以慰吾兄懇切耳  
前尊使回已有字奉候近聞勝遊歷下見萊老當自言  
及小弟也致意爲禱他日卜居湖上老作隣翁不可不  
商量留意耳試牘重刊呈閱拙詩亦在付梓另時請教  
小物附呈晒照餘不悉及旋里當在五月意欲從濟宜  
一路可以圖晤臨時先使人馳聞三月廿四日弟九頓  
名恕

花明柳媚春色一新福履增勝惟有時切懷想耳人事  
變遷江鄉又一局面值弟離任之日大費周旋苦衷難

言而考核之疏皖城公頓易初念置之等仕路嶮巖從此踰伏泉石大合夙願不復再作妄想殊自快也新撫軍元宵後卽出都南下乃特命趨裝不能少停懸揣其車轍所經定由泰山一路弟意欲煩吾兄候於道左爲弟懇懇囑托弟於三月內卽交代閩仙雖爲去任之官而交前接後頗有關涉非藉吾兄爲大護法又誰職其責哉撫軍係敝年伯素在教愛之下者若非吾兄鼎言則聖賢之用心行事固非庸愚所可測識也如何如何望深思而自得之倘吾兄愛弟之深憐弟之拙且勞

顏氏家藏尺牘卷二

望

海山仙館叢書

用力一言則受賜多多矣更望早賜回音以慰鄙懷桐江有信來否錫鬯又駐石城正促其捉筆也夏秋間在吳門定爲吾兄構一青衣報命餘不悉及北望翹切數年相依情逾骨肉一旦分袂能無痛思每與二三同人言及不勝悵結台駕抵里多時唯望節哀加食至祝至祝錫鬯送來墓表一道馳寄一覽老年伯行誼表章難盡以弟愚昧細讀此作文字平平似有未見錫老之長者年兄閱之以爲何如阮翁年伯亦與弟無異辭也前留紙書寫倘此文必用則仍返回原稿惟祈酌之燈



下草草餘衷不宣  
兩接來教如相晤譚自年兄出都凡有衷情無可告語  
始見平日手足之誼與他人不同不如此離索不知也  
念甚念甚時在寢食夢寐中大事自應竭力然時事艱  
難亦不宜大爲虛文拮据憔悴愛身以承先志又大孝  
也誌銘自當沐手一書但稿在何處詢之綸錫亦云未  
見其故何也想緘發時又遺忘耶速示之香酒事幸不  
辱命已結局矣抄稿呈閱不盡欲言

誌銘稿至立偕孔年兄送虞山先生書就矣台意亦命

顏氏家藏尺牘卷二

吳海山仙館叢書

弟書第碑版之體非方正穩妥則不堪觀弟何能操筆  
耶又不敢重違來諭勉爲一紙并呈尊覽既有虞作可  
以勒石則拙筆聊爲副本而已刪去前面多銜亦此意  
也頃染暑疾泄瀉不止又值漸生小兒出痘草草臨池  
益露醜態率復不一

昨老冬烘誤我至此大違本懷年兄知己想亦爲弟捉  
鼻耶不遠卽塞責此番公案焚筆碎研作田舍翁本色  
再不敢惹事矣水曹照命忽而得補真出意外但以長  
安之珠桂吾土之飢荒實有隱憂耳邇來臂腕作痛精

神衰憊大異疇昔唯好靜坐最厭讀書如何如何大作  
五古一帙記在林澹亭處容尋獲緘寄海內名士雲集  
金門弟實未敢見一人卽阮升諸先生亦僅打照面而  
已踽踽涼涼土木形骸俟年兄來就正有道另闢新境  
也關注屢屢未及裁答客夏在雒口萊孺家得以備悉  
况味坐談夜半恨不三人晤對罄厥寸心今復春色如  
許闔宅近履伯母萬福臨啓翹切不宣

老年母北上知一路平安喜賀喜賀盛价東旋又接手  
教骨肉關切無刻不置諸懷抱間樂天寄微之云以我

顏氏家藏尺牘卷二

望  
海山仙館叢書

今朝意知君昨夜心今日之謂也底事南音已奏安貼  
乾淨可望竿頭進步但從中結構大費思議舍弟晤商  
知必有以教之也如何如何廿年來知己老友可語以  
身心性命者惟我兄一人尙庸多贅哉日來抱病乃憂  
鬱所致呵凍草草紙短意長也十五日辰刻弟百拜

兩接手教又見遽使心甚慰快留之多住數日種種可  
商也離任之官景象便不堪世情如此亦無足怪考核  
之疏至今未上皖城公意亦轉移四字之評不敢復望  
不再強求居易俟命是我輩本來學問也聞各省皆註



上考恐將來必有變局難言之矣撫軍曾晤過否其意若何望確示以寬懷抱弟別無囑致惟恃我年兄耳桐江之言似乎游移今已另字寄去俟有回答再報錫鬯在石城其詩可得裁管家帶回可也青之頗有葛藤臬君可笑卽此一班亦可以見人情矣餘情續佈草草不一

顏氏家藏尺牘卷二

吳海山仙館叢書

似水薪米爲艱需次兩年後之學差不啻河清屢思告休議者多以爲不可安得知已如吾兄而與之決進退哉家居樂趣不可勝言此味只淡泊寧靜人知之世情太熟者昧昧也托疾極是而良晤頓慳殊悵悵耳同人落落閉戶岑寂卽升六輩亦難見面矧論詩耶著作等身便中惠教爲望弟寓卽吾兄舊居乃黃宅也月例五金綸錫作成敢乞台鼎向令親家黃大年翁一言爲弟作保寬其窘乏之時不忘圖報之地或年餘交割短長不齊俟弟量移時清算完結在黃年翁素契不薄自肯

肝胆相照而吾兄所以委曲周全乎小弟者此今日第一要事也老伯母康健萬福大年兄人都不遠舍弟後輩全仗提攜一言難盡臨筆翹切大作一冊在阮翁先

生處遣人往討云批評未竟不肯發年五十又生一子聊作眼前之戲不免後日之累甚可愧也宦情消磨都盡但恐坐不定又想出山此與老翁生兒同一醜態惹人嘲笑補法如何前有幾人亦望查示也兒曹廷試欲觀北場又慮迴避于乃叔畢竟以東闡爲妥邇來文氣何者爲善惟祈揣摩至當有以教誨

顏氏家藏尺牘卷二

兗

海山仙館叢書

之弟草野之人久不識文字爲何物也晨夕之間望呼至膝前耳提面命吾子卽君之子也能膜外視之哉前字已緘再書數行仍不能罄弟再頓首歲聿云暮福祿倍增企賀企賀弟一病半載衰白日甚堂堂五十不勝感慨也兒子能文小孫頗不庸俗差快人意耳但家計漸窘明春作嵩少之遊借以彈鋏望兄爲我策之然此道甚難不大寂莫便好也如何如何所謂睡貉者又復告歸飢寒奴僕賤人情世態類此矣更有書記張姓亦金陵人爲弟抄寫而適用者盜衣而去



聞在都下其人無賴乞留意防之切切卧病村中回首  
廿年閱歷如隔世事而骨肉知己朝夕想念者惟公一  
人此衷可質鬼神也不謬不謬京朝大官待漏多勞寶  
嗇自愛不宜山薑弟雲伏枕草

盛使北上數行奉聞想入記室弟有高山之遊正在東  
裝亦無聊之意也茲小价偶至都再候起居外李世桀  
一僮昔蒙惠用其人亦醇謹無俗氣第應賤役於村野  
農夫之家學灌園織蓆似不相宜窺其意若厭薄其主  
人者屢言辭歸白下弟不許仍欲送之年兄未識可否

顏氏家藏尺牘卷二

五

海山仙館叢書

當示我也林下之冷落如此富厚勢位可忽乎哉用是  
增太息耳秋爽薄寒珍攝爲望臨筆不勝渴想中秋後  
四日弟雲頓首

前有台札見示弟抵里後始接到也得榮補之信喜極  
欲狂從此崇階晉秩爲萬物吐氣我輩生色矣弟來家  
數日遂有第三子之痛幾至喪明近日脾病泄瀉景况  
不堪鬚鬢全白竟不似人形老年兄先生骨肉關切其  
何以救之考核一節南中杳無音信大約不妄到時望  
照拂始終種種留懷知己之前烏容多贅然筆墨所至

不覺喋喋皆出衷腸也別言在盛使口中眼昏腕痛燈  
下草草伏祈慈照爲禱小弟雯頓首

家食習靜奉母課兒頗有趣致况鬢白眼花漸成病廢  
抑且囊中虛空無以爲出山之資真不可奈何者也專  
探吾兄超擢消息便是林下老友揚眉吐氣之日區區  
不足道矣西山爽氣秋色照人待漏啓事亦甚勞瘁望  
保重自愛以慰鄙懷念念徐公所抱何恙竟至不起而  
房中耳東先生亦有怪症不能久延良可歎也盛使到  
時已暮且同友人花間小飲燈下草草不及多書附有

顏氏家藏尺牘卷二

至  
海山仙館叢書

劉函山集八冊並小札乞轉送方山

手指痛已五月此生與寫字無緣非懶也拙詩書於佳  
扇醜不可當奈何蛟老詩畫皆通怕人怕人年兄大作  
定求一二日卽賜大教斷不可遲乃見相愛之至小弟  
雯頓首

弟呈想未投明日決投爲主仍望年兄帶入或擲下弟  
送之司務廳歸念已定事在必行不復猶豫也蛟門已  
走附聞弟雯頓首

望老做年伯選文之意甚殷弟亦欲必終其事特我輩



無暇實不能日赴漪翠園同研席也下孟文取來奉年  
兄晨窓夕燈爲加丹黃定於初八日告竣李年伯尙欲  
於歲前寄到維揚而我輩亦早完此一審公案斷不可  
少遲一日也至祝至祝弟雯頓首

交雖多然精選不過三十篇足矣無可分任之者只求  
年兄撥冗一閱頃刻竣事爲妙快雪堂已付之工人矣  
餘晤悉

舍弟揀選乞留意倘在二十名之內感頌非淺門外一  
送峨眉真戀戀不忍言別也家中人至歷下似是訛傳

顏氏家藏尺牘卷二

至  
海山仙館叢書

并聞不一

刻下急過梁園晤話且以文事相商也

季老門兄  
倚老年兄弟雯

頓首

弟連日病痢又輪上夜守晚莫可推辭苦極苦極年兄  
明早不必進直午後早早進宿何如倘與人更換亦祈  
以此意促之感感弟雯頓首

部中自有揭帖送內不聞有掛號之說也俟明日問來  
再報弟雯頓首

來諭領悉想不能無費也前孔公者昨問當事云不知

容細查再聞弟雯頓首

唐詩奉上此老軸已訂之須有以相贈方行也不一弟  
雯頓首

程處士遂

吳楚三年義聲在東南久而相化比其旋也王大令擁  
楫飄飄然人士莫能載酒祖帳所賴江流一動色云爾  
徂歲屬望當如心之懸擬茲獲瑤函仍然燕居耶小技  
苟爾餬口之物慙媿一生謬叨先生之品題遂使閉戶  
得以馳驟於大人先生耳感荷施開府廣爲徵汲焉得

顏氏家藏尺牘卷二

五  
海山仙館叢書

不萬里歸心日來淮南郭子抑王聖起兩公傳述至愛  
嗣容另展未敢自必也別來殘喘幾幾就木季春忽舉  
一孫目力腕力頓有少壯之氣四章應聲用命願勿時  
於等閒何如何如函詢勝事全銷妄想恆念簡子之于  
周舍反覆故人鐫文叔間中道中情豈堪貽笑學者乎  
秦淮風景竟爾空谷無聲曠古未曾見此使者自金閭  
往還速甚荒函率勒容覓便布草略不恭敬下遂頓  
首

三章落款謹上因茅天老行急竝馳呈耳頃歸爲屐齒



傷足負痛明日痛止始能奉陪適得洗藥未必速効也  
遜翁先生道宗教下期邃頓首

昨別後偶有五岳方寸之感遂復大醉今日幸勒成二  
章先以稿呈教此道不能如古人運斤成風覺前賢所  
謂慘澹經營用盡一生心差近之先生必以爲然乎刻  
下落款竟躬上之不敢塞責負安德兩君子也草草白  
教下邃頓首

今晨候遣役不來只得着童子覓姜西老曦所書得之  
渠積慕至久其有許多要言急欲與翁先面傾急使人

顏氏家藏尺牘卷二

五

海山仙館叢書

從扶老處促駕矣如已歸尊寓乞卽同臨我何如茅茅  
老及周李兩公有興與俱不另約修翁先生道宗教  
下期邃頓首

宜鑪所重別真偽美式非所急世之罕物豈能求全然  
先生不喜索耳只得發精秘曰橘囊者以贈此通身橘  
皮棠紅腹中翡翠兼備不容多注脚矣前一字作緩急  
語惟裁示之有一札上學君容繕託不一修翁先生顏  
夫子教下期邃頓首

石田畫敬付名手裝補而其人已入京師不可待先生

所用裱家聞頗善謹奉上請敕從事何如今日德躬當  
安和讌遊必有應酬之煩也念之念之教下邃頓首  
擬明日候臨一陳鄙蓄探知未暇乃卜初五矣所約同  
觀朱先生及客中二三子來不可却耳上修翁先生顏  
天子教下邃頓首

前日報一遠客冒雨病大劇今日藥後始能趨候耳字  
彙首尾二帙奉到此部屢經翻刻者也教下邃頓首  
昨歸路冒寒風乃急傾盃中物竟醉極未作報今日凜  
冽不能事筆墨久欲獻片語於學者終日竟句未成隻

顏氏家藏尺牘卷二

五

海山仙館叢書

字也竊願乞名世贈言垂不朽前荷許諾至是重有請  
耳惟求先生屬意切切之甚周子先不更啓祈致之教  
下邃頓首

前集不知先生竟行也昨聞尊府梁上君相過耳以足  
痛不復奉候今日小雨印文曾換字否謹待命之紅字  
一律書呈諸先生一笑如有成求一示爲望遜翁先生  
顏夫子教下期邃頓首

先生方虛居蕭瑟而四國景從之徒莫非相累殊媿歲  
寒促促無以分憂乃辱厚賜且情溢乎詞再三躊躇恐



迂人傑命世至意拜渥之感不安爲甚也草草就謝夜來開酒戒正蹈小愈加病奈何奈何藥後當趨頌也遜翁先生顏夫子教下期邃頓首

昨別後脾病轉劇不得時來左右以盡將離之緒今晨服肉桂佐參求事休息或可振也黃紫垣一字呈覽欲乞噓牘于何子受權部邃雖有交非先生九鼎安能生色耶敢爲之請惟裁可否何如草草不一遜翁先生顏夫子期教下期邃頓首

今日趁未凍作區書因久不事此故稍爲副本不足存也希先生直加去取或竟付無用以待大手筆何如五章皆落款馳上刻下欲躬詣而忽然雨作不敢前矣茅先生一冊卽書乞致鄙意發來塗鴉請教耳附白脩翁先生顏夫子期教下期邃頓首

連雨不能趨侍然乘雨勒得三篆急馳請教焉夜來與嚴方詒柱史飲談及先生風義于其尊君有知己之篤非尋常也渠來此謝孝舟泊響水橋下偶一相聞云諸容面悉遜翁先生顏夫子教下期邃頓首

此中感荷相尋夜來更承提挈不覺沉酣與談言淋漓

交極也。領沃嗜研篤好，因以所藏最上者進之。其德備美，殺墨尤纖，不必多下註脚。先生藻鑿自精矣。田公明日行否？今夜仍命駕於彼否？體甚嚴重，苟見召，則前兩相樂，何如？草勒不悉。小兒不敢持刺，可執鞭也。修翁先生顏夫子教下邃頓首。

兩晴未定，今日當入舟否？耶前承鑒別，諸鄙藏弗審尊意，何居不妨商畧，何如刻下欲湊成卜居事，敬託篤老求緩，急貳拾金乞，卽垂手容不日報也。修翁先生顏夫子教下邃頓首。

顏氏家藏尺牘卷二

五

海山仙館叢書

前之舊凍發還時，不蒙裁決，累日未見談及，以爲可止爰而止矣。適間命及所謂，知其所好而投之，然選石難遽得，未若三獻不錄之物，恐竝此又爲人有了。漢玉山乃焦太史家物，送來先生觀之，卽擲下可也。教下邃頓首。

首

先生尊足，應藥銷滅否？賤目忽爾羞明，不獲過從。石谷一字代白，昨見其做古妙甚，明晨可告成也。草草白原字附上。教下邃頓首。

昨遽聞歸與有期，不勝惘悵。所懷百端，難自舉耳。施石



以爲盈几橫陳必得佳者如式矣今爲日甚迫將奈何或姑從小者爲之或俟後期性命之天篆兄先生藻鑑之下倘果有意渠可竭忠執鞭且受師資克凜讀書之志年來鍊氣知紛襍多害至誠是力云行止聽尊裁非細商不可此兄見事多若得儒宗指南琢磨俾理顯於林府何如何如教下遂頓首

天篆兄適來詢問已備述垂愛至意亦共聞歸裝伊邇也然際倥傯非留客之時欲攜紫蟹數枚造先生牀下少談今夕共相許否謹代白之教下遂頓首

顏氏家藏尺牘卷二

五

海山仙館叢書

壽施排律爲韻長短廿韻內外乞示之業屬吳天篆兄彼俟先生見客時申謁耳明日方伯曾奉訂否文宗爲其郎君抱病四路延醫故遲遲來也玉石貲望擲與犬子附白教下遂頓首

文宗五章求致其式先乞教之施公先後石皆平常之極今石遠出其上索而按之是其驗也宜早定爲望教下遂再頓首

倪處士會鼎

水陸半日便可瞻謁太翁先生以慰三十年之饑渴承

此大教快不可言宅報謹領達再承何札感甚匆匆夜  
歸大什未及捧誦然已望氣知奇矣承台貺不敢概領  
而使者將命甚殷謹拜登謝謝弟粗解書不容布鼓雷  
門辱委是小巫之見大巫神氣爲殫容詰朝書上適以  
貴座師暫留尙有三日之停諸容別佈不一

洒脯論交昔賢所貴辱召固無辭理第尊體違和不宜  
久坐且弟行色匆匆塵事龐雜坐方台命惟祈原亮瘡  
瘍最忌服烟及豕肉炙燂之類其有所試不可不戒程  
單所列祈照察便覽如有心期在其地者敬求寶字數  
行明晚候領帖誼瀆陳臨岐爽爽

顏氏家藏尺牘卷二

五

海山仙館叢書

尊體已平復乎甚念大率初發宜清散潰後宜補託此  
用藥之大法也辱委直是班門掉斧勉報甚赧大筆真  
有虎跳天門之概令人心折一筮求飛翰數行得卽揮  
幸甚倘台冗詰旦候領諸不一

客夏從文度王世兄附致一函定達青臚履端更始萬  
象俱鮮煥發新猷益徵宏曠矣先嚴賜地賴趙公祖而  
全後有爭而去者亦已別補雖高下有殊而事無虛設  
悉繇高雅永矢勿諼敬謝先嚴遺書未剖曩荷虹襟以



屬恆齋王父母不意旋即解事未克經營今會稽新宰  
想已銓除仍祈鼎呂鄭重始終雅願弟閉戶却掃編著  
因禮會歸一書以晰文獻衍義之所未精與增所未備  
又以半日餘晷守虛湛之天憚與世接惟希爲鈍子運  
建先容之俾又籍手遺書亦先君所銘勒也相致之後  
仍祈金玉見示卽致王世兄郵下爲禱諸不覿縷徒有  
神奉

遺書荷厚雅曲謀刊布感在先人泉壤不止弟子孫世  
世也奏牘仍存忌諱自不妨借輝燕許必不可則求弁

顏氏家藏尺牘卷二

卒

海山仙館叢書

引尺牘候武林草示誌大德於不朽耳尺牘分類而復  
編年有國事民瘼時事經濟文章駢偶心期泛應上交  
汲引持己家函諸目此其概也弟習靜簡出或有剗劂  
事須面商於王父母者意欲令小兒運建代爲啓白然  
尙未識荆晤時祈世臺并爲先容及此區畝書報殊不  
稱渠之望尊札祇候揮擲臨岐再圖趨送並鳴謝弟會  
鼎頓首前贊中一字之一宜改隻古風內籍疑誤作藉  
不妨屬他手一爲改註遺篆冊容日奉繳小楷逼真二  
王如蒙惠篇什望卽以此體書教

獲誦教答有似雲虹賀監湖邊鄭宏溪曲引領紫氣者  
又且數月而此傳華軫更將西適吳會果爾則抵掌之  
緣復失於交臂謹此聲問以慰旁皇讀太翁先生傳畧  
忠孝同歸爭輝日月董狐輩出自致千秋附將先傳要  
惟老世臺昆玉發其熊魂然傳中敘司農事殊簡而先  
集諸板多闕失其舊本卒未得致未卽寄覽所已送部  
者有奏贖鈔刻諸本及應本講編二種希伯仲參攬其  
間也貴通家王父母溫恭豈弟氣誼文心俱稱最上自  
爲絳幄游揚野人雖甚心儀要不敢躋堂數溷先集之

顏氏家藏尺牘卷二

空

海山仙館叢書

未刻者有計樞奏牘及尺牘雜著諸編其已刻之集先  
爲健兒投爨斤板無存三十四年間欲以漸謀削竟無  
一就帖在高雲倘邀數行與貫通家商此數種傳之通  
邑大都此爲壽我先人雖石泐海枯義存無斃自非高  
誼薄霄固不敢及此耳統惟鑒原諸不飭縷倘駕尙東  
渡翹首以俟另一先傳祈寄令兄世臺未及專啓爲罪  
也

鑑湖抵掌以來又數更裘葛檣車迹覽方還啓事芥蒂  
山川鳴鏘廊序盪胸浴日交擅其長方諸升林殆復過



之矣時從貴門入王恆齋悉起居粗慰遐鄙恆父母今  
之魯山車路已輕忽爾顛躓文法困人坐失琬琰良可  
惜也數年交誼視見輩都如手足所媿畸人莫致百一  
弟老至無聞內求性道而未能悉謝人緣焚棄筆墨似  
此因循深慙知己風便附候都不顧縷敝郡牧令中有  
可爲小兒運建鄒吹地者祈瑤函一二卽郵致王父母  
轉示可免石頓之虞禱

燕山抵掌一別十年秋葦之感無時去心令問休暢景  
卿百爾野人疎陋室於鯉鴻惟是高談在耳舊詠娛心

顏氏家藏尺牘卷二

奎

海山仙館叢書

千里縈紆不覺其遠側聞老世臺稅駕聖湖心眉並飛  
會方鍵關習靜不卽褰裳居恆未嘗迷夢尋之路及旣  
咫尺乃更河漢抑何悖耶緬惟昔者飲德南返間關鄭  
鄉把奉太翁先生款洽累日相與謁聖林登關里瞻姬  
公復聖諸廟貌還拜祖太翁前賢於松柏間聯袂行吟  
繾綣惜別會幾何時而琴亡梁壞可勝悽惻豕雞旣媿  
昔人馭寄亦乖驢責古今之不相及大略如此矣令友  
玉昆龍光載煥其爲繼述足以千秋靜功圓日當坐晤  
於雙高之下倘鷓首東來懷古越王之城則日占紫氣

引頌望之率爾佈候諸容面罄不悉

未刻上疏先錄其半以奉台覽敢祈弁言用昭來禩三都託元晏乃始益行莫爲之後雖盛莫傳道固然也惟老世臺不吝珠玉成茲遠萊率懇不恭并祈原宥弟會鼎載頓首

鳴榔遄遽當繇宛委山靈慧力輕淺不能多邀篇什耳前懇大序爲先嚴奏牘之輝望卽屬草容泥首以謝頃一筭附使求臨池數行惟教之冊卷明午繳上先筆一通奉覽小純一筭并求揮歸卽令奉謁弟會鼎頓首

顏氏家藏尺牘卷二

七

海山仙館叢書

吳御史涵

自趨叩函丈後適抱微疴靜攝數日兼以大篇義蘊宏深非末學晚進所可倉猝卒業反覆展誦始敢管窺遲遲未報深用歉然但涵實淺陋加以舊學久荒妄有贊歎亦恐無當高深如何如何尚祈太老夫子進而教之尙此稟復尊稿并趙上不一涵載頓首

雖館事告終日內彼此拜賀世情雜遝一時不能卽了長安做官人算此便是正務良可歎也承示大篇久羈恐悞剗劖昨力疾從燈下展卷快讀恍如蘇滄浪斗酒



披閱漢書其樂無極軟塵袞袞中得時聆此德音少陵  
所謂欲覺聞晨鐘令人發深省增長志氣不淺耳謹先  
以三首趙上非敢云僭跋得附大集爲箋註之流庶幾  
管中窺也但諸臣篇涵意以不付刻爲高陳蔡大夫不  
云乎其刺譏皆中諸侯王病恐以吾道爲兕虎耳如  
何如何餘容續綴并寫拙詩呈正也做鄉親姚琛新授  
崇仁巡檢前已面陳倘荷九鼎如戴生成并祈卽發爲  
感尚此稟達不一涵載頓首

前奉謁時承問及刊工之精妙者遍訪得一友向係刻

顏氏家藏尺牘卷二

五

海山仙館叢書

呂晚村天蓋樓之手其鏤劃端好筆勢飛動所不待言  
崑令人送到其人朱姓號若聖惟祈採用必不悞也此  
稟涵載頓首

嚴侍郎曾榮

疎違良晤不覺忽近一月此心實依依左右奈半月來  
爲瘡瘍所苦且有不可告人之狀以此久疎我世臺先  
生也幸到西湖如此之久而弟不獲時時攀教論心自  
愧自笑然非澹然忘之此中有難以言喻者卽告之世  
臺先生亦未必遂相信耳風日頗佳曾得可意人否日

內因有俗冗畧緩一二日尙圖屈敘也昨未布復端此  
奉謝書法之妙真絕頂矣小弟槩頓首上  
偶因不得已有一唐突語命小价面稟倘可周一時之  
急弟於世翁三衢旋省之日卽行奉趙老世翁來客敝  
地弟斷不敢爽約也實緣至急赧面耳亮之制弟槩稽  
首

顏氏家藏尺牘卷二

七

海山仙館叢書

相別忽忽月餘正思叔度昨承枉過始知台駕到省今  
擬趨候奈體中偶爾小劇未得振足悵歉何已承示佳  
句古氣遒勁絕不猶人真傑作也敬服敬服所諭翹楚  
語意在童子乎抑非然耶明日稍可當趨叩以悉制小  
弟槩稽首

董孝廉俞

三衢與谷之月頃於春試於世翁來客敝

一春陰雨不得時侍大教用深耿耿歎辱諭題藤陰讀書  
圖偶成二絕書正但可供捧腹耳不肖月初要往婁江  
以客歲在都川鄭山老以一札屬謁顏州尊至今逡巡



未往聞係貴同宗不知其果好客否山老之札可恃否  
不肖恐徒折盤費故未敢去幸老先生示之鄭札呈覽  
覽畢乞付來爲禱修翁老先生小弟俞頓首

董進士舍

陰雨連旬幾有漏天之憂聞先生扁舟獨遊雙屐所至  
題咏必多三泖九峯爲之生色矣讀書圖勉應尊命醜  
詩惡札自見欲嘔况大方乎仰求痛削稍霽卽走晤不  
旣小弟舍頓首

春雨連綿不能走晤頃讀瑤章如觀大國之風吳人辟

顏氏家藏尺牘卷二

空

海山仙館叢書

易矣舊刻二種呈教小扇倘可選略賜以大作庶可邀  
惠於不朽矣小弟舍頓首

朝承枉重頂卽趨晤駕尙未歸悵然而返知文旌明晨  
便發聚首兩月依依之情如讀河梁之什矣前趙二火  
傳諭鄙作實契子心卽改二語今附正先生風雅領袖  
方今作者雖多知愛我實深敢以拙稿三種計入冊附  
先生行李倘遇知音或選家爲弟代致一經品題聲價  
自倍弟蕭然四壁分隔青雲竊欲以此表見海內名公  
相與者多其未識面者不過數人耳今得先生可以無

憾矣倘明日未行尙當走別躬送臨穎惘然不盡欲語  
脩翁老年臺先生大人知己小弟合頓首改讀書圖二  
語希爲較正看君意氣隘八溟吐辭歷落詩清冷

昨知當事遨遊九峯傲邑山川想領畧殆盡矣韶九父  
子俱滯林陵往問其家漫無以應此外藏紙者絕少奈  
何奈何容廣詢報命也卽走晤不旣小弟含頓首聞友  
趙二火想不能無望於先生卧山六益兩公聞已上達  
托弟晤時緩致此意并聞

兩日微患目疾不獲走晤念切念切適有小僕顧姓爲

顏氏家藏尺牘卷二

空

海山仙館叢書

圖靈詐害頃以一札達魯公祖聞今夕奉屈台駕得爲  
鼎言囑其始終照管魯公祖待弟輩極有情分重以先  
生一語尤妙幸留神是荷明走謝不旣小弟含頓首  
往青溪兩日不獲走候弟處惟有廣韻卽附來手明後  
日當圖把晤耳脩翁老年臺先生小弟含頓首

張觀察衡

客春拜別條已再歲遙念兩年兄孝履此中常翼翼耳  
正在懸想忽辱瑤函兼詢遽使知先年伯大襄已竣未  
得走送墓門躬効執紼負罪莫贖奈何弟於春初請覲



旋里遂有上谷之役歸來匆匆爲兒女俗緣所累日與五作爲儔伍俗氣撲人不復知筆墨爲何事矣承命書碑未敢遜辭揮汗勉副拋楮滿地無一合作對大巫而却步可笑也隕越盛舉罪過不小斷宜另尋名書易之耳扁四字具見兩年兄自命之嚴承家作聖實在於此極爲歛衽但欲稍寬報命無訝其稽延爲望耳兩年兄從吉匪遙榮補在卽弟無一芹之將敢辱大貺藉手奉璧千祈心原冬抄弟假亦滿例當繳照貴衙門想可聚首長安也臨楮神馳不具

顏氏家藏尺牘卷二

亥

海山仙館叢書

二册塗上冗中勉副不能如意也聞法黃老畫已經取到幸付來手前綾並求揮擲也草草不具小弟衡頓首連日未得趨教耿耿前煩求法老先生作畫弟亦往拜一次今可相催乎幸留意不具弟衡頓首

俗緣日絆欲結琴社未能憾甚憾甚一綾煩大書送李仲淑年兄令姪太學生也乞早教乃感通法寺琴弟伺其在可同年兄往觀耳弟衡頓首

連日俗冗無有停刻筆下亦帶俗氣不能強也承命書數紙試筆不堪着眼明日再寫呈教恐終不中用耳卷

須稍爲展限如何如何弟衡頓首

前蒙諭手卷已送康老書訖今又致南兄矣想不至久滯也昨送貴部人名弟通未留心一看不知弟俸如何開祈抄示爲感諸晤罄

年兄所付側釐以移寓不知所在另塗二紙奉教不足以當一噓也外有敝友端石一方托弟求售頗鮮潤發墨年兄欲得之弟卽取呈法照價亦不甚爭持幸示之弟衡頓首

黃處士雲

顏氏家藏尺牘卷二

充

海山仙館叢書

秦漢碑版夢想不得一見乃承傾儲見賜感勒可言謹謝謹謝小詩一首塗紙附呈求斧政垂和更感大約復日方得東歸衡老札領到錢塘札容卽草上晚雲再頓首

尊照如命敬題謹呈上唯改削存之晚有白雲庄廬墓圖未攜來其略在毛馳黃札中乞贈一詩書宣紙上至懇紙小幅幸查到史舍親薄程輶褻欲奉攀尙未得如願耳羅兄母壽併望華袞此亦至誠君子也脩翁老先生晚雲頓首



趙贊善執信

日者疎聆雅誨心常耿耿每欲奉求法書未敢唐突  
敝同年孫子立同有傾企之私今奉使安南欲得贈行數  
語倘不吝珠玉初旬幸賜下也尙容面頌不宣上脩翁  
先生弟執信再拜

鄧舍人漢儀

梓人周長年技極精敏而爲人更老誠謹以貢之臺下  
有所劖刷乞呼至堦前面授之必不辱命耳漫草一序  
祇以請教不敢災梨也上修翁先生老年臺小弟儀頓

顏氏家藏尺牘卷二

七  
海山仙館叢書

首

黃編脩士垣

暑甚不能走晤爲悵昨研是一友人從粵中攜出者眞  
青花水坑也弟與之論價已久因囊空未及購取耳老  
年臺如喜之大約非十金以外不能售也茲有敝友馬  
叔載兄武林舊家爲人儒雅善琢研若有佳石必須名  
手故囑其奉叩幸老年臺進而教之餘晤悉弟黃士垣  
頓首

王推官仕雲

顏先生人倫師表私心嚮往良久昨者因病卧有失迎  
迺函欲請教負荆日來未見手復心甚懸懸特此再求  
明示或竟送席如何穆翁先生我師弟仕雲頓首  
天氣雖暑禮不宜遲已戒庖矣確於二十五日治具送  
顏先生旅次借重道翁主爵弟日來下體結燥苦不可  
言不能陪侍奈何穆翁先生我師弟仕雲頓首

王處士宏撰

自違道範迄今七載緬懷丰采寤寐爲勞每於邸報中  
得榮擢之訛爲之喜慰而道阻且長不能時通音問祇

顏氏家藏尺牘卷二

三  
海山仙館叢書

增悵望耳小兒赴國學趨謁台堦仰冀照拂知先生於  
故人之誼定不薄也臨楮翹切不盡欲宣

孤陋之人兼以衰病日侵自分邱壑老矣乃逐時賢之  
隊溷跡京華不特夜慙枕衾抑亦晝媿天日而翰教遠  
來遽以激昂相期豈所望於先生乎惟道阻且長音問  
久疎先生儼然衰絰之中而弟未能稍申雞絮之儀中  
心是疚如何可言誅詞見屬不敢以功賤爲辭但願寬  
之異日耳佳稿尙未獲讀容於天生處取之統俟再報  
小作附呈唯先生教之病目草草不能作細字後晤無



期但有悵望弟宏撰載頓首

承手札知甯人溫喜慰慰墨刻之惠如得百朋此復並  
謝弟宏撰頓首

方欲走候得手札詢之使者知已就道殊爲悵悵耳落  
魄腐儒不能盡地主之儀惟知已諒之怨之擲筆黯然  
修來先生弟宏撰頓首

辰刻欲趨晤知山遊必倦恐悞美寢是以不至耳舍弟  
適來奉拜午刻邀過其齋鳳至亦同往唯早過幸甚修  
來先生世弟宏撰頓首

葉處士閣

從會稽客中一別自教不覺五易寒暑歲月遷禪如駒  
過隙每當風雨牢落之際未嘗不伏枕懷思吾儕翁先  
生之高誼更篋中所藏珠玉時時把讀如對晤言拙選  
詩觀二集又補登大篇數章以光不朽閣風塵碌碌浪  
迹江湖所心服此道風雅宗圭以起衰末如先生當世  
有幾人哉茲杭州故友王樂天來京之便謹修數行奉  
候新祉王兄精於岐黃而詩句復大雅可觀藉弟曹邱  
得晉謁於龍門便中假之齒頰俾韓康賣藥都市人人

識其姓名爲荷多矣餘情縷切不旣

會處士燦

別後卽有真州之行留劄寓中候駕遣取乃竟不果何  
耶嗣於二月內復攜魏刻至金陵又值仙舟往皖恐有  
浮沉復不敢留今屈指數月知先生斷不到蘇矣故敢  
將原刻二十冊附上希爲查收魏舍親旅櫬已歸其令  
姪從家來云做親母聞舍親之訃絕食十三日而死義  
士節婦萃於一門真奇事也做友兄彭躬庵一書及其  
門人梓行集中并爲附覽可以得其大槩已先生以闡  
揚幽隱爲己任倘遇名賢廣爲流布亦千古一佳話也  
拙選苦不得竣且卷帙日廣愈難發行未審當事肯爲  
將伯之助否弟餬口無策溝壑堪憂先生誼篤友生當  
必有爲弟地者幸以教我便羽附候不盡神瞻

正欲遣人走訊得接翰教知已返棹刻下卒歲無策小  
兒天花未愈竟不能還山明早奉叩履端當親聆塵談  
也田文宗諸詩前已發刻但在奇窘中未得取回俟遣  
走索報命如駕行急只得再圖後舉矣何如何如尊賻  
致魏先生者似宜備一禮單方可賚往弟初四卽往真



州往返在旬日間鄧尉之約萬毋見負爲祝小弟燦頓

首

前月曾郵一緘并魏舍親合傳托周雪客兄轉致至今未見報章豈竟浮沉耶聞駕尙留金陵千里江山三春花鳥盡收入少陵彩筆中恨燦阻此帶水不能一誦黃初佳句使白間生黑絲耳燦潦倒無似溝壑堪憂雖不得望昌黎之哀號豈不能効唐衢之善哭然終無有起而拯之者信乎其命之窮也先生文章風雅齒頰皆春散吹煦而生羽翼者端有望矣近欲重理過日一選現

顏氏家藏尺牘卷二

五

海山仙館叢書

在鳩工前先生攜去序文凡例皆較售已定別無副本乞爲簡出交學在兄轉寄俟脩補完日卽當另繕一冊就政有道可也黃生想已不售其人亦已謝去重煩尊念啣戢不旣

前月附一槭奉候想呈典義矣日望台旌之至怒如饑渴坐守蕭寺匝月有餘又未見遣發紀綱不知何故知耽西冷山水或又別有奇遇故遲遲其行耶今再以數行奉訂如過此月不至弟將送小兒南歸取道錢唐當親資魏舍親傳稿及其文集奉覽可也書到望卽見答

勿令久稽爲感本擬遣小力崙致因刻下遭一意外之  
變奔走經營日不暇給茲值便鴻再函相訂希惟原亮  
臨穎主臣

弟本不能作字欲錄近詩就正倩人捉刀故爾遲遲布  
鼓雷門徒深皇恐耳外箋一幅求周年翁大筆以爲光  
寵望轉致之今日因有公集不暇走候遲晨當就教并  
話別也大作已向秋翁處領到矣容面致歸不一小弟  
曾燦頓首

西泠邂逅殊出意表但恨未傾筐倒庋飭聆塵談耳還

顏氏家藏尺牘卷二

畫  
海山仙館叢書

山卽致家傳於叔子舍親緣以伏枕呻吟參苓藥餌爲  
費不訾一切筆墨槩行謝却以先生爲文章宗工景仰  
已非一日又令祖老先生大節凜凜爲誼所不容辭故  
倚枕構思日內方得脫稿卽欲賚送因向有重陽之約  
恐彼此相左徒費往返茲值有便鴻崙械附候倘先生  
一時未得解維或遣人到蘇來領或俟大駕親臨一聽  
尊指大抵崙函禮幣似不能少先生幸一酌之可也弟  
近奇窘異常竟爲浙幕所累小兒到吳半載至不得歸  
先生素重交游能爲弟另覓一席否韓昌黎所謂哀號



泥塗不得不望於大有力者拯而出之也學在昆仲刻  
下卽有真州之役若到吳門幸向申衙前問朱明寺方  
丈可得弟踪跡否則遣人至光福亦不遠耳諸容面頰  
不旣尊稿爲友人攫去致七律一體竟未登板望速郵  
一冊見寄立俟立俟

陳中書玉璫

憶江樓奉教過承高誼如雲迄今銘佩弟於上年三月  
抵都卽聞老年伯仙遊之信不勝痛悼束芻絮酒深愧  
古人罪歎奚似益都夫子見示尊狀稔知老年伯文章

顏氏家藏尺牘卷二

美  
海山仙館叢書

孝行不朽天壤大筆纏綿委宛曲盡孝思使讀者聲淚  
俱下溽暑節哀千萬珍重接手翰極荷注存感刻無已  
但以弟樗材而濫登薦牘方日夕惶懼門兄應有教我  
乃亦爲不知己之談耶拙刻散亂無以就正容俟白駕  
赴都之日細求指南耳遽使旋草此布復臨穎翹馳  
弟行矣儲年兄尙有數日留當更與老年門兄暢晤也  
底事深感周旋乃君自圖展報悉之玉兄頰間其別商  
玉兄意欲藉鼎叨惠弟於中亦可分餘潤想老門兄所  
樂爲者餘皆玉兄面悉瀕行肅勒未一陳玉璫拜

伊中丞闢

憶違儀範再易裘葛注念之私與日俱積因乏便羽未  
得時脩候音取惻於懷接翰教悉老年翁孝履清佳深  
爲慰藉弟日事俗冗逐逐於車塵馬足中通無好懷可  
聞知已草此布復附候起居令兄門翁不及專字幸爲  
叱致不盡馳切

柯鼎 俟致

昨台旌倣發未遑祖饒前行以抒款曲耿耿在中至今  
不忘既聞孝履清嚴復不能以時佈候殊深懷抱茲當  
服闋引領星躔而惠音肆好不啻面晤發函展讀何深  
以厚也弟近狀平平無足粗述把晤非遙姑需來日別  
諭使者俱已領悉肅楫佈復可任依溯

翁員外英

前勞枉顧以外出未及倒屣殊深悵耿豚兒荷老年翁  
栽培弗敢自弛以負恩施但賦質駑鈍卽日加淬礪之  
功未審能仰副惓切否耳月課求嚴加改削倘得藉南  
指以不迷所往感刻曷有既耶表題有時務急擬者并  
求賜教所諭河差前任以四月初旬到任但今歲多一



閏月赴任則在來春三月初定例以三個月前題差自  
不出臘月初事也倘可稍遲尙圖面傾率此暫復未一  
鄧參議秉恆

拜別之後於八月六日至豫是日卽赴宴入闈不敢因  
循本省舊習平正並取濃澹兼收惟以不背朱註者爲  
尙幸外監諸同事力矯從前之奇苛一切謄錄收受悉  
從寬大以故得卷甚多除孤經卷少不得不節取外其  
三大經盡拔其尤文風稍變甘名之內似不遜江浙諸  
大省也老年長兄自鑒別之惟是所最苦者舊撫守制

顏氏家藏尺牘卷二

五

海山仙館叢書

謝事新撫履任尙遲場事一畢內簾星散求望顏色而  
不得弟輩不得不束裝就道矣然事例又萬不可廢業  
已照上次措足倘有一切不及檢點之處望槩爲包容  
弟非木石敢忘所報哉弟爲先壠不得不歸家一爲料  
理幸卽賜完結遠人得以安心總容至京之日泥首百  
叩不旣

郭侍郎蔡

拜別後晝夜兼程屆期抵汴鎖闈視事冰淵戰兢中州  
文字素多平弱謬欲矯偏諸美成錄幸外闈諸公力反

前苛士子各盡所長頗得佳卷老年翁玉尺冰鑑自能  
照徹弟等苦衷也獨是孤經寥寥無由拔奇選雋耳次  
第之間大意可見撤棘以前慎重檢點似無舛錯但因  
郎撫軍督促甚迫當日封卷卽刻起發字句差訛未敢  
自信其全無也總恃老年翁愛我憐我慨爲錦覆貴衙  
門諸大君子並求切致微有苦者豫州節鉞新舊往來  
人情渙散分枝者見解卷迅速漫不關切弟兩人事竣  
冰冷雖大聲疾呼誰其聽之千里之外深慮愆期不得  
不勉力從事弟之素况久在洞鑒中知老年翁自能憐  
我愛我也就中緩急肯綮悉惟台命耳元老函中言之  
甚悉不更颺縷弟不久抵都當泥首崇墀稱謝高厚並  
布餘悰倉皇草率不盡欲言伏惟照注臨楮禱切

侯郎中杲

前駕駐龍江時小兒輩往來淨上過蒙老年兄猶子之  
愛優渥過情教誨之餘復損隆惠歸道種種媿感何極  
弟自去秋罹變熒熒苦塊死無生理遙聞老年兄新履  
勝常惟有北望額手而已茲以敝邑歲貢士王諱仁灝  
故粵憲雪軒先生之令嗣也齒少於弟十有五年績學



善屬文敦盤之好推牛耳者幾遍海內今甫逾壯已哀  
然爲多士冠入對大廷久仰龍門思欲自進於臺下至  
出谷考校諸項俱乞老年兄一一提誨而獎進之弟係  
總角交而兼至戚故敢代爲先容若夫文章聲氣之合  
知老年兄別有賞鑒固無俟弟言爲諄囑也部中滿公  
各求爲弟叱名道相念苦次率勒不備不莊伏希崇照  
憑穎瞻切

憶晤別猶昨而花事又一年矣年兄擁江南勝地值此  
春華命聳飛觴必多樂事若弟寂寞江村惟日與同事

顏氏家藏尺牘卷二

十一

海山仙館叢書

愁眉相向幾不知爲春到人間也捧讀瑤翰色笑如親  
不勝慰藉前小兒來便過龍江叩謁闈役套辭然弟實  
不敢謂年兄之薄惟蕪關顧年兄相計錯銖雖舍間攜  
一蔬菜必不使沾河潤故彼銅役來亦以直道相報豈  
親厚如我年兄而敢有所致疑乎或誤指顧年兄之言  
耳承示不敢不自白倘終不能見信差竣時亦惟有如  
白諭所云可耳笑笑小兒旋再令叩謁幸進而教之種  
種俱俟面悉不旣

王提學如辰

弟自前冬重入都門以爲可昕夕得領良朋指示不意  
年兄忽讀禮言旋離羣之感時切寸衷頃接手教方知  
老年伯仙脫已返名泉祇以里地阻隔踈節多端罪歎  
當何似耶屈指明春台駕自當北上聚晤有期是爲跋  
望耳近日孝履清和並闔宅康吉謹此附候不勝瞻切  
孫浣思 俟攷

高賢賁止得覲紫芝草野後學榮藉何可言喻日來陰  
雨未得趨叩絳帳尙擬天時少霽潔治葵藿奉攀騶從  
以伸嚮往也思戰伐餘生依人乞食小集實類蛙鳴顧  
影自悲形穢謬以大君子不棄不敢自文其醜而不就  
政有道日來諒蒙塗就望卽擲下如謂小子可教或可  
錫以弁言思且不朽侍獵圖可賜一覽否竚立竢之等  
於饑渴先此瑣瀆清嚴再容走晤不一

張太守楷

竹樓豪飲已醉飽明德復承台惠愧感益深所訂已商  
之舍親遲一二日卽圖面教茲以便羽附謝雲謹兼有  
敝相知吳姓以臬司處細務來省凡可以照拂者希推  
分援之感當無旣不盡縷私臨穎馳切



過承渥愛謝東札收到並切雲誼所訂明春弟必預  
來面教萬勿他就禱切禱切佳卷新句統此謝教不盡  
制楷再勒

何羽士規中

前月二十三日台駕遊放鶴亭山野適東渡越水失迎  
爲罪并未知駕發吳門不獲摳衣相送抱歉更何如耶  
承賜聯句令人爽目快心懸之山樓垂不朽矣昨在山  
陰擾兩水亭主人道及台駕相敘於此有澹影亭三字  
失於面求因特囑轉懇大筆山野昔曾面求放鶴亭詩

顏氏家藏尺牘卷二

全

海山仙館叢書

一二首已蒙俞允倘不吝珠玉伏乞卽賜鐵畫銀鈎勒  
石孤嶼爲山靈生色猶勝蘇公解帶矣臨楮翹切之至  
外附呈拙墨并一扇請正區紙一卷賤名單肅

史提學逸裘

叨附夙雅仰庇雲天浹歲以來無時不溯洞塵下也特  
以庸非守拙肆應無方翹企之懷徒困於心長綆短繩  
惟世講之誼雅契淵源益勤仰企敬因報竣之役文牘  
之外附陳家刻用寫寸私伏冀鑒存諸藉青睞不一

釋興源

憶雲駢枉過楊柳依依春風融怡今忽白露爲霜矣流  
光如電念之耿耿每歎貴顯名流華屋深居高自嚴重  
閉置形骸役役聲容之內賢者或能放情詩酒披閱經  
史以自陶寫卽一城一邑之事猶未周厯又安能網羅  
見聞恢廓拘蔽欲爲通人達士亦難矣卽司馬子長以  
曠世逸才尙窮厯天下名山周行萬里而文始奇崛故  
其論敘陸離光怪波飛龍躍驚心駭目豈非山水之靈  
足以發人才思滌人襟抱耶君侯以泗上衣冠聖門華  
胄乃能驅車南北徧求隱逸五嶽煙霞披筭殆盡而溫

顏氏家藏尺牘卷二

全  
海山仙館叢書

溫和雅不以富貴驕人道性天悠勝情霞舉但恨交臂  
而失懷想爲勞耳華山之游元訂晨登夕返再談世外  
因緣不意熊軾西征竟上九華黃海不知深林大澤中  
亦有至人逸士可遇而不可求一興猶龍之歎否晤長  
干沈君知旌節近駐青溼極爲欣喜小言一章奉懷明  
德山野之語不必以工拙計也與三給諫歸楚可曾來  
白下否念之念之尊寓鄰近有藏恕菴其僧正信頗多  
功行間時散步迴翔翳然林水亦可追濠梁風味矣野  
刻山圖附覽敬專侍僧恭候與居臨楮瞻依近作五首



呈教

名顛俟考

前者承年兄見許魚鱉幸付來手爲荷弟顛頓首

王御史九齡

前承老先生年臺軒車枉顧緣僻處荒村離城六十餘  
里有失倒屣隨廁名諸同人之末奉邀大駕又不獲趨  
陪讌笑彌深耿愧昨捧讀瑤篇格律高渾意者清深直  
令盛唐諸名家退避三舍邇來古調不彈虫吟瓦響爭  
鳴於世今得老先生李杜文章振起頽靡真風雅之極

顏氏家藏尺牘卷二

禽

海山仙館叢書

幸矣服膺何已不揣效顰呈削珠玉在前自覺形穢如  
何幸直教之爲荷刻下擬輕舟奉謁因賤體冒風而家  
君又以年衰憚於遠出東道之誼殊抱歉然外具微物  
聊供一箸伏冀笑留家君命筆申候臨穎翹切

張侍郎鵬

都門得奉教言受益良多頻年因鯉鴻未便未能時候  
台社然馳想之私實與日俱積矣年兄讀禮之餘著述  
必富方今 聖天子延訪鴻儒振興古學其足應風雅  
之選者不當爲年兄首屈一指乎未知服闋何時人春

明何日拭目望之至令兄先生文行俱堪楷模金昆玉友可方軾轍機雲便中幸爲道意做通家兩孔兄近日學業若何高賢在望不當時爲就正乎相晤間亦祈叱名爲禱率此附候臨穎神依

此題捧讀年兄大篇及令兄先生擬墨使弟有觀止之歎令兄先生作如登泰岱俯視一切千山盡是培塿年兄作如游溟渤目空萬里百川皆屬支流矣真稱一代機雲弟當爲之拜服僭評不能盡佳文萬一望教之教之弟再拜劃然二比具大閤闢化古文爲時文妙直一

顏氏家藏尺牘卷二

全

海山仙館叢書

氣卷舒中有無限精蘊非沐浴乎大家沉酣乎先輩未易臻此卽起文恪諸公於今日讀之亦應頰首弟南溟擬評

張尙書士甄

久疎塵雅顛企殊殷使至接大翰承注問慙切極佩遠懷向以至誼攸關自應相照何敢煩齒及耶寄箋書上深愧塗鴉何日命駕來都得一敘契濶也顛望顛望使旋肅復并候新禧餘未縷陳臨池瞻切

疎隔塵談兩更裘葛每懷雅範時切顛思茲拜大函承



老年親翁注問殷切莊誦之際殊佩遠懷使旋肅述謝  
悰并候孝履餘容嗣布臨穎瞻馳期侍士甄頓首拜具  
沈郎中允范

臨行承年兄諄諄提命長途銘刻矢之沒齒矣今籍茆  
試事告竣一時公論頗蒙許可僉云夙習頓清爲歷科  
未有庶幾少副良友切磋之雅也惟是榜發匆促恐不  
無疎忽仍未審足當大方衡鑑否耳近詩三卷祈年兄  
逐句分疏一有差悞卽祈郢正或再有未盡之言容弟  
入都補作刻下神疲心竭一字難成想知己定當慈諒  
也不盡委曲在麟兄代奏百凡祈鼎力維護統竣旋日  
泥首以謝率勒不備臨楮籲切別諭貴役曾喚數次不  
來當事處已細述台旨矣并復

孫侍讀一致

知已不加譴責重以回示謬爲鑒許足見吾兄原天性  
敦篤人也乃以水旱輕棄其鄉數年來違手足之恩割  
兒女之愛疎親族朋友之好爲東西南北之身縱放意  
於山水山水果可樂饑卽肆力於詩文詩文又安可立  
命耶君子立身有本末制行有輕重吾兄所云白首他

顏氏家藏尺牘卷二

余

海山仙館叢書

鄉而不悔也果從其本且重者乎抑從其輕且末者乎  
兒女長大婚嫁似當關心田地荒蕪差賦將誰撐持種  
種未了難完之局吾兄清夜自思恐不能不一作歸計  
也尤宜念者長公寄行踪於旅食次君荒正業而嬉遊  
媳不得以夫爲家女安得以伯爲父然則吾兄所云山  
水文章夫復何用而白首他鄉者亦獨何心吾竊謂不  
可必之功名姑宜少待不必濃之遊興似亦索然矣歸  
與之歎其能已耶其能已耶唐之世兄王姓者已北行  
矣不肖時懷集木臨谷之懼不敢以片紙進都也幸知  
我愛我鑒之恕之見惠壽山石頗屬時尙敢不登拜其  
繭紬一束仍便付令兒女爲衣弟當之不忍也草此謝  
復無任激切懸望之至弟致頓首

鄧觀察旭

去春爲送三小兒江北完婚遲留先人舊栖甚久種種  
疎節難以言盡復聞老年世臺陞還之信買棹奉候冀  
圖一申祖餞之私不料台旌十日前亦已啟行悵惘無  
已未幾承高足白仲調年兄見過出老年兄留別珍貺  
見貽捧對之下益深感愧茲因羽便特此報謝貴衙門



改授之例雖目下暫停側見 皇上破格用人都非常  
情所能窺測以老年臺世家鼎望兼之才隆德厚計不  
次之擢當在指日跂賀跂賀但山中病骨未審何日再  
奉天上清光念之可勝馳結晤呂錫老乞切切致懷想  
之私至洪谷老南綰淮關生以意外牽滯未獲造訪迄  
今耿耿都煩叱名道念臨楮不盡依依  
撤進士木哈

報命北行叨愛諒容附驥招徠無術底事正爾關心捧  
讀來翰真不啻面頷教言卽欲遣人再往第恐亦緩無

顏氏家藏尺牘卷二

文

海山仙館叢書

濟於事矣蒙諭銅觔之說自是事出一轍弟因錢銅買  
辦艱難勉將銅板廢銅湊足今裝運在船以俟開行貴  
關所欠無幾惟尊裁酌收完局蚤便起行所云有不容  
已之事弟詣省之日當面商可也並祈老親翁心照不  
既

田少傅種玉

隆施盛饑稠叠有加每一思之感慚交集十九日自潞  
長行仰藉蔭芘一路安驅二旬內已竣兩河試局矣此  
後局戶索居毫無事事勞人草草何以消此歲月耶窮

愁岑寂尙未深嘗不敢預陳以厯台慮也率修短楮用  
慰遠懷臨穎依馳惟有延竚

顏氏家藏尺牘卷二

完

海山仙館叢書



08757

1278

顏氏家藏尺牘卷二 終



